


DÎYÌ DYÀ CIMANYINU

 Twasàkidila. Swâyi bwà tùshaalè biimànyine kuulu katanci kakesè cyanàànà, patùdì tubala Dîyi apa, tûye buludì ku Dîyi dilòòlò edi, nàнку katwàkwangata dîbà dyàbùngì to. Ndi muswè bwà nùbuululè pàmwè naanyi, dilòòlò edi, ku Mukàndà wa Ekèsòòdè, ne kubangila ku nshapitá mwí4 wa Mukàndà wa Ekèsòòdè.

Ki Mòsà kwandamuna e kwamba ne: Kàdi, mòna, bóbò kabààkungitabuuja to, anyi kuteeleja dîyi dyanyì nànsha: bwalu bóbò nebàmbè ne: MUKALENGE kî mmukumwènèkèle to.

Ki MUKALENGE kumwambila ne: Ncinyì cìdì mu cyanza cyèbè aci? Ki yèyè ne: Dikombo.

Ki yèyè ne: Dyèlè panshi. Ki yèyè kudyela panshi, ne dyòdì kwandamuka nyòka; ki Mòsà kubangaye kunyeema kumpàla kwàdì.

Ki MUKALENGE kwambila Mòsà ne: Olòlà cyanza cyèbè, ne ùmukwàcìlè lwà ku mukìla. Ki yèyè kwolola cyanza cyèndè, e kumukwàtayè, ki yèyè kwandamuka dikombo mu cyanza cyèndè:

Bwà bààmònakù mwà kwitabuuja ne MUKALENGE Nzambì wa baataatù bàábò, Nzambì wa Abraham, . . . Nzambì wa Izàkà, . . . Nzambì wa Yakòbò, mmukumwènèkèle.

Ki MUKALENGE kumwambilaye kàbìdì ne: Tèèkaaku mpindyewu cyanza cyèbè mu dyàpà dyèbè. Ki kwelayè cyanza cyèndè mu dyàpà dyèndè: ne pààkacipàtulàye, mònaayi ne, cyanza cyèndè civwa cimeta kudi nsudì bu mùdì nêjè.

Ki kwambayè ne: Elà cyanza cyèbè mu dyàpà dyèbè kàbìdì. Nènku kwelayè cyanza cyèndè mu dyàpà kàbìdì; ne kucipàtulayè mu dyàpà dyèndè, ne, mònaayi ne, cyòci . . .kwandamuka kàbìdì ànu bu mubidi wèndè.

Nènku nebyènzekè ne, bóbò kabàyi bakwitabuuje wèwè, anyi kabàyi batèeleje dîyi dyà cimanyinu cyà kumpàla to, ne nebùtabuuje dîyi dyà cimanyinu ciibìdì.

² Twìnyikàayi mitù yètù. Nènku ne mitù yètù miinyika, ne myoyi yètù, kàbìdì, ndi ndìkonka ní kùdikù muntu kaaba aka dilòòlò edi udi ne malòmba à disambila? Nudikù mwà kuàmányisha panùdì nwela byanza byènù muulu apa. Nzambì ànùpèku malòmba ènù.

³ Taatù wetù wa mu Dyulu, tudi batùùtè dyàkalenga bwà kwikala ne dyèsè edi, bwà kulwa Kùdì mu disambila, tulwa mu

Dîna dyà Mukalenge Yesù. Ne tudi balayìibwè kùdiYe ne, twètù balòmbe cintu kanà cyònsò mu Dîna Dyèndè, necifdiibwe. Wèwè udi mumanyè dikèngela dyà umwe ne umwe wetù. Udi mumanyè civwà byanza byètù bìleeja pààkeediibwàbi muulu apu. Ndi ndòmba, Taatù, bwà Wèwè kwandamuna dilòmba dyònsò dilòòlò edi. Angàtaaku butumbi.

4 Nènku mpindyewu swâkù bwà Mulongeshi munène wa Dîyi, Nyumà Mwimpè awu, àlwe pambidi pèètù, dilòòlò edi, ne àDìbuululè kutùdi, ne—ne àDìmanyisha Yèyè mwinè kutùdi, ku ci—cileeeji cyà dibìikà Dyèndè dyà ku lufù. Swâkù bwà Yèyè àlwe munkaci mwètù, dilòòlò edi, Mukalenge, ne—ne àKùmbulèku myoyi yètù. Àkulè neetù ku bintu bìvwàye mulaYè bwà ditùkù edi. Swâkù bwà Mèyi àvwà malayìibwe bwà dîbà edi àmwèneshiibwè kumpàla kwètù, bwà twètù kushàala batwishìibwe, mu cikondo eci cyà cimvundù cyÚvwà mwambe ne ncifwànyine kulwa pa buloba, bwà kulumbulwisha bantu bònsò. Nènku bushùwà tudi bafikè mu cikondo aci, Taatù, cidì muntu ne cyà kulumbulwishiibwa. Nènku kùdi matumba mashiilàngàne, mu mùshindù wà ne kakwènà muntu nànsha umwe udi mumamyè cyà kwenza to. Kàdi, Mukalenge, ndi ndòmba bwà wadìmanyisha kutùdi, dilòòlò edi, ne Wèwè udi mwab'ewu, kàbidi mwikàle neetù, Udi mwab'ewu bwà kutwàmbulwisha. Twenzèlaakù malòmbà ètù, bwalu tudi tulòmba nùnkù mu Dîna dyà Yesù. Amen.

Sòmbaayi.

5 Ntu ànu mfika pashiishe ndambù dilòòlò dyònsò. Nènku ndi ànu ntungunuka ne kwela meeji bwà cikòlòkolo *eci*, kàdi's ncyòci cyà bisanji bìdi bìkwàta mèyi. Kàdi eci *eci*, *ndi* ngèèla meeji ne, ke cìndi ne cyà kutèeleja, anyi kwakwilamù.

6 Maaàlabà dilòòlò ndilòòlò dyà difestò, nànkù kanwikadi nwâpwà mwoyi to. Ndi ngèèla meeji ne. . . Ndi ngèèla meeji ne bàkaavwa bamanyishe, pa bìdi bitàngila mwaba ùdi bantu ne cyà kuya.

7 Ncyà bushùwà ne tudi twanyisha dyelangana dyà mu mu dibòko mu bintu binène bìdi Mukalenge wetù mwenzè.

8 Mpindyewu, dilòòlò edi, ngèèla meeji ne, twètù katùyì bamanyè Dìyi dyà Nzambi to, katwèna bamanyè cyà dyenza nànsha. Katwènà mwà kwikala ne diitabuujà patùdi katùyì bamanyè diswa dyà Nzambi nànsha. Nènku, ncinyi, dîbà adi twètù bamanyè ne ke diswa dyà Nzambi, Dìyi dyà Nzambi dyàmba cintu kampànda, dîbà adi tudi mwà kucilonda ne disànkà dyònsò.

9 Mpindyewu bu ne Mukalenge Yesù úvwa wènda wèndakana, yèyè mwinè, pa buloba dilòòlò edi, mu mubidi wa buntu, ne Yèyè kwamba ne: “Maaàlabà mvùla neàlokè, ditùkù dijimà,” mpindyewu mbifwànyine kwikala bipeepèle bwà mèmè kwangata dikumbi pàndi nguumuka mu dindà, bwalu Yèyè

mmucyambe. Mpindyewu, bu Yêyè kàyì mucyâmbè to, ncyèna mumanyè dîbà adi cyà kutàngila to. Pa nàнку mùshindù awu ki ùdîbi, mu cintu kanà cyònsò citùdì twenza, tudi baswè kumanya dîbà, cikondo citùdì ne mwoyi eci.

¹⁰ Kàdi bwà bantu bapyabàpyà, lumingu elu tudi batêtè bwà kuleeja ne Nzambì, kwambwila ànu ku cibangidilu, ùwwa mumanyè ndekeelu. Aci's cidi ciMwenzà udi kàyì mpwîlu. PiikalàYè ne mpwîlu, ne mpwîlu, Yêyè kênà Nzambì to. Nènku Ùdi ne cyà kwikala wa bukolè bwònsò, ùsanganyibwa myaba yònsò, mumanyè byònsò, ne wa bukolè bwònsò, bwà kwikalaYè Nzambì. Ki bukolè bwònsò mbwòbù abu, mmumanyè bintu byònsò, mu myaba yònsò, ne—ne—ne mmumanyè ndekeelu kubangila ku cibangidilu. PiikalàYe kàyì nàнку to, dîbà adi Yêyè kênà Nzambì to.

¹¹ Pa nàнку kakwèna menemene cintu nànsha cimwè mu cincyòmpancyòmpa to. Ntwètù. Kàdi kakwèna cintu nànsha cimwè mu Dìyì dyà Nzambì; cidi cituuta bu mùdì ntankù amu's. Nènku pàdi dîbà dikùmbana bwà cyòci kwenzeka, Dìyì didì dikòsa bwà cikondo aci, didì dyènzeka. Tudi bafwànyine kwela meeki ne cidi ciya. . . kacayàkwenzeka to. Mîngà misangu cidi cyènzeka kàdi twètù katùyì bacimanyè to. Yesù wàkamba, musangu kampànda. . .

¹² KuMwambilabò ne: “Bwà cinyì bùdì—bùdì. . . bafùndi bònsò bàdi bàmba ne ‘Eliyà ùdi ne cyà kulwa dyàmbedi?’” Nwamònu's, mpindyewu, bàvwa biitàbùùje aci. Bàvwa biitàbùùje ne Eliyà ùwwa ùlwa.

¹³ Ki Yesù kubàtàngila, kwamba ne: “Eliyà ùkaadi mumanè kulwa, kàdi nwènù kanùyì bamumanyè to.” Nwamònu anyi? Mpindyewu, nwamònu's, ncipicile ànu ku luseke lwà bafùndi abu, bambi, bayiidi. Nènku ùwwa n'Yone Mubàtiiji, nènku wàkalwa ànu mu mùshindù wònsò ùwva Eliyà ne cyà kulwa awu, nànsha nàнку kabààkamujingulula to.

¹⁴ Nènku mpindyewu bìdi ne musinga kutùdì bwà kujingulula dîbà ditùdì ne mwoyi edi, ne cikondo citùdì ne mwoyi. Pa cyòci aci, ndi muswè kwakula dilòlò edi pa ne: *Dìyì Dyà Cimanyinu*.

¹⁵ Cyena-bwalu cyà pabwàci, èyo Nzambì ùtu wènza bintu mu mishindù yà pabwàyì. Ki cidi ciMuvwija Nzambì ncyòci aci, bwalu Yêyè ùdi—Yêyè ùdi mutàmbe-mfùkilu. Ne cintu cyònsò cidiYe wènza, Yêyè—Yêyè ùdi ùcyènza, Yêyè ùdi mwà kucyènza mu citàmbe-mfùkilu, bwalu Yêyè mmutàmbe-mfùkilu.

¹⁶ Mpindyewu, *Dìyì Dyà Cimanyinu*. Ne didì. . . Kùdi dîyì dyà cimanyinu. Kùdi dîyì dyà mashi. Mashi àkaakwila pa buloba, ne—ne bikwàbò ne: “Mashi à mwakàne Abèlè awu àkaakula àdyula Kayinà.” Ne Bible mmwàmbè ne: “Mashi à Yesù Kilistò àdi àkula bintu bitàmbe bunène kutàmba mashi à Abèlè.”

¹⁷ Mpindyewu bwalu bwètù dilòlò edi, anyi cyalu cyètù, cidi cikàngukila mu Ekèsòodè. Nènku cikondo cyà Cimwangi

ncikondo cyà dibìikila bwà kupàtuka, ne cimwangi cìvwa pabwìpì.

¹⁸ Mòsà, musadidi wa Mukalenge, ùvwa mubìikìdìibwe ku—ku mudimu. Nènku ùvwa wènza cìvwaye wèla meeji, ùvwa mulonge tùlaasà tutùmbùke mu Èjjiipitù, mulonge lu—lungènyi lwònsò lwà beena Èjjiipitù, ne mùshindù ùvwàbì bimwèka ne yèyè ùvwa ne—ne mùshindù kampànda, wà kwikala mùsàlaayi munène wa meeji matwè, ne ùvwa mukùmbàne mwà kupikula cisàmbà cyèndè kucyùmusha mu bupika abu, bwalu yèyè ùvwa Pàlò uvwa ulonda. Ne mùshindù mene ùvwàbì bitekète menemene bwà yèyè kwikala mucyenzè. Kàdi, nudi numòna's, bu ne aci cìvwa mbwalu, dībà adi's cìvwa cìfwànyine kwikala ncintu cyà mubidi ewu.

¹⁹ Nzambì kàtu wàngata bintu byà mubidi to. Ùtu wàngata bintu bitàmbe-mfùkìlu bwà kuDìjaadika Yèyè mwine.

²⁰ Pa nàнку kumupàtula mu bidimu makumi ànaayi byà malonga, à bintu bitùmbùke bikolè bìvwaye mwà kwikala mupetè, ne bitàmbe bwìmpè bìvwaye mwà kupeta, mùvwàye mwà kwikala mulongi mutambe bwìmpè wa dibàla amu; ne cyumvwidi cyà kùdì mamwèndè, ndeeji wèndè awu, bwà ne ùvwa ne cyà kwikala ewu uvwa mwà kupikula cisàmbà cyèndè; nènku kupàtukayè mu bukolè bwà cyumvwidi cyèndè, e kushebeyayè mwena Èjjiipitù umwe. Nènku, kuumukila ànu apu, wàkajandula ne diditacisha dyèndè dyàkapangila, ke pashìshe kunyeemenaye mu cipèlèlè.

²¹ Nènku cìvwa Èjjiipitù, ku dilonga dyà kàlaasà, mutèèke mu yèyè mu bidimu makumi ànaayi aci, byàkakèngela bìngà bidimu makumi ànaayi bwà Nzambì kubìpàtula mu yèyè, nwamònu's, bwà kùkadi wàlwa kweyemena dilonga dyèndè dyà maalu à bùkàlànga à mu kàlaasà to. Ùvwa mwà kweyemena citàmbe-mfùkìlu.

²² Nènku mpindyewu cikondo cìvwa pabwìpì bwà ne Nzambì wàkàfila mulayi, kùdì Abraham, bidimu nkàmà yìnaayi kumpàlà kwà cikondo aci, bwà ne dimiinu dyèndè divwa mwà kusòmbela mu buloba bwenyi, ne bàvwa ne cyà kupàtudiibwa. Paanyimà pàà bidimu makumi ànaayi, bàvwa mwà kupàtudiibwa ne cyanza cyà bukolè. Ùvwa mwà kusungila cisàmbà cyèndè ku cyanza cyà bukolè. Nènku dībà dyàkaseemenà cikondo cyà mulayi, ke dībà dyàkatèèkà Nzambì Mòsà mu cyalu. Mòsà, mu dipangila dyèndè dyà kakùyì mpatà adi, ùvwa muyè mu cipèlèlè.

²³ Mpindyewu cimfwànyì kaaba aka, kùdì cimfwànyì cyà dikèma mwab'ewu citùdì menemene katùyì mwà kupanga kumòna to. Nwamònu anyi? Bileejìibwe mu cimfwànyì ne, Nzambì ùvwa munkaci mwà kutwàla Izàlèlèlè, cisàmbà Cyèndè, pambèlu, ditùnga, ditùnga dipàtuka mu ditùnga. Ditùnga dipàtuka munda mwà ditùnga, cimfwànyì cilenga

cyà leelù, cyà ne Nzambì ùdi ùbiikila Mukàji Wendè musèla ùmupàtula mu èkèleeziyà, Mukàji-musèla mwena Kilistò mupàtula mu èkèleeziyà wa beena Kilistò, Èkèleeziyà Mukàji-musèla mupàtwila mu èkèleeziyà, udi mubiikidiibwè, mu Bible, mutèèdiibwe.

²⁴ Ndi ne tuntu tuvulè tufùnda ne Mifùndu bifùnda kaaba aka, pa dileesònà edi dilòlò edi.

²⁵ Ùdi ùbiikidiibwa, misangu mikwàbò ne: “Basungùdiibwe, Basungula, anyì Bashààdilè bàà ku dimiinu dyà mukàji.” Wàkabiikidiibwa ne: “Mukàji-musèla,” cìvwà Nzambì, ku didyànjila-kumanya Dyèndè, mulongolola bwà kwikalayè nàнку. Mbwenà kwamba ne, Mukàji-musèla ùdi ùpàtuka mu èkèleeziyà. Nwamònu’s, cintu cyònsò mu kaabujimà cidi èkèleeziyà, kàdi Nzambì ùdi ùpàtula bantu mu èkèleeziyà awu, bu Mukàji-musèla. Wàkamba ne Yèyè ùvwà mwà kwenza nàнку. Ne mònaayi ne, Yèyè wàkacyènza, anyì Yèyè neàcyènzè.

²⁶ Mònaayi, mònaayi mwàkacyènzàYe, ne mùshindù ne mwàkacyènzàYe. Tudi baswè kutàngila eci mpindyewu, ànu mwàkapàtulàYe Izalèlèlà amu, mùvwàYe mucyenze, ne mùshindù wàkacyènzàYe—Yèyè’s.

²⁷ Mònaayi ne pàakalwa cikondo cìvwà Dìyi dilaya ne cyà kukumbana, Nzambì wàkabiikila Mòsà, ku didyànjila-kulongolola, ne kumusungula bwà mudimu. Nwamònu anyì? Nzambì ùtu misangu yònsò ànu ne muntu tàyadi, pa dībà adi mene. Cintu nànsha cìmwè kacitukù cipangila ne Nzambì to. Yèyè ngudi mucyàmbè; kacyèna mwà kupangila to. Cyòci cipangile, dībà adi Nzambì mmupangile, bwalu Nzambì ùdi Dìyi.

²⁸ Mònaayi ne, mpindyewu, bìvwà bikèngela bwà Dìyi kumwèneshiibwadi. Nènku dībà divwà Dìyi ne cyà kumwèneshiibwa, dyà mulayi kampànda, Nzambì ùtu misangu yònsò ànu ùtuma mupròfetà bwà kumwèneshà mulayi awu, bwalu Dìyi dyà Mukalenge ditu dilwa kùdiye.

²⁹ Mòsà, mudyànjila-kulongolola bwà kiipàcilà aku, wàkabiikidiibwa ku mudimu. Kakùvwà mungà muntu uvwa mwà kuwènza nànsha.

³⁰ Dībà dīdi Nzambì mu—mubiikile muntu kampànda bwà mudimu kampànda wà kwenza, kakwèna muntu nànsha umwe udi mwà kwangata kaaba kèndè nànsha. Kakwèna muntu nànsha umwe udi mwà kwangata kaaba kèèbè nànsha, wèbè mùshindù wà sungasunga awu.

³¹ Mùshindù mwìnè ùntù ànu ngadìkonka’s ku musangu ne ku musangu ne, mùshindù kaayi wùndi mwà kuswa bwà kwangata kaaba kàà Oral Roberts, mùshindù kaayi wùndi mwà kuswa bwà kwangata kaaba kàà Billy Graham, muntu bu nàнку awu. Bu mùdi Billy Graham, ùyaaya kaakula ne musumbà wà batèeleji, ùbiikila bangènzàmpèkààtù ku cyoshelu; bijikila ne wàlukila

kumbèlu, kàyì ne cyà kwimana mwaba awu ne kulwangana mvità kàbìdì to. Mémè ncyènà mwà kwikala Billy Graham to, kàdi nànsha Billy Graham kènà mwà kwikala mémè to. Tudi bônso bàbìdì. . . Ncyènà mwà kwikala Oral Roberts to; Oral Roberts kèna mwà kwikala mémè to.

³² Nudi, muntu ne muntu, mutèèka mu cibùcilu cyà Nzambi, ànu bwà kaaba kèndè. Ewu ùdi ùjila byàkudyà misangu yónsò ne ùbwela mu bwobùmwe ne Nzambi, piine apu mukwàbò yéye wìpata badémons bwalu ewu ùdi munkaci mwà kujila byàkudyà. Kàdi cidi m'Mubidi wà Kilistò mu kaabujimà kàawù ùkwàcila mudimu kaaba kàmwè, bùmwe. Patùdi tumòna mikàlù yà cyena màngumba eyi yitùkòsolola, aci's ke cidi cisaamisha mwoyi wànyi, nwamònu's, bwalu aci ki cintu cidi cìtùtapulula ncyòci aci. Tudi umwe.

³³ Kakwènakù bantu banène munkaci mwètù to, kakwènakù bantu banène munkaci mwètù to. Twètù bônso tudi mùmwè. Tudi bânà bàà Nzambi. Kùdi ànu munène umwèpelè munkaci mwètù, ne mwìnè awu n'Kilistò. Tudi ne cyà kuMujingulula. Kàdi patwikalà tukèba luumù, ewu lwà kùdi mukwàbò, katwèna mwà kupeta diitabuuja to, bwalu tudi twitabuujiangana muntu ne mukwèndè. Bikèngela twikalè ne diitabuuja mu Kilistò. Yéye ki Umwèpelè munkaci mwètù utùdi ne cyà kwitabuuja, ne pashìshe diitabuuja mucidiYè wènza ne cidiYe mutùpèèshe.

³⁴ Mpindyewu, muntu nànsha umwe kàvwakù mwà kwangata kaaba kàà Mòsà to. Nànsha bàmba ne mmuvùkùte lùbilu lwà bìshi, nànsha bàmba ne yéye ùvwa mutètè kucinyeema bìshi, cikòlà Nzambi mmumanyè cidiYe munkaci mwà kwenza. Yéye ùvwa mumanyè mene CìvwaYe ne cyà kwangata ne kucipàtwila mu Mòsà. Bintu ebi bìvwa bikèngela kwenzekabi. Mpindyewu, tàngilàayi, muntu nànsha umwe kàvwakù mwà kwangata kaaba kèndè to.

³⁵ Mpindyewu tàngilàayi. Nzambi wàkamupèèsha cimanyinu, bwà kujaadika dibìikila dyèndè ne mèyi àvwayè wamba, pàakapwekàye mu Ejiipitù apu.

³⁶ Mpindyewu, Nzambi ùtu misangu yónsò ànu ùpèèsha mùsànjeelà cimanyinu, ne dīyì dyà cimanyinu aci. Ne cimanyinu aci cidi cìmanyisha muntu awu, pìikalàci cìfùnda mu Mifùndu.

³⁷ Bu mwàkambà Yone ne: “Mémè ndi dīyì dyà ewu udi wela lubilà mu cipèèlà.”

Bòbò kwamba ne: “Wèwè ki Maasiyà awu anyi?”

³⁸ Yéye ne: “Mémè ncyènà Maasiyà awu to. Kàdi ndi dīyì dyà ewu udi wela lubilà mu cipèèlà, bu mwàkambà mupròfeta Yeshàayi.” Yéye ùvwa mwà kudileeja patòke.

³⁹ Nènku mpindyewu, dibà adi, mu cyòci aci, tudi tusangana ne Nzambi, misangu yónsò, kàtu ùshintululakù mùshindù Wèndè wà dyanza cintu kanà cyònsò to. Kènà mwà kushintuluka to.

Nzambi ùtu wènta bintu byònsò ànu mu mùshinù ùmwèùmwè, pàdiYe—Yèyè ùbùungakaja ndongolwelu Wendè.

⁴⁰ Ànu mûmvwà mwâmbè dilòòlò adi ne, Wàkangata dipàngadika òmwè ne, muntu ùvwa ne cyà kusùngidiibwa ku Mashi meela panshi à Ewu uvwa kàyì mwenze bwalu nànsha. Tudi batète bikwàbò byònsò, bwà kufikisha muntu ku disùngidiibwa. Twakateeta bwà kumufikisha pa kaaba katùdì twibaka cimenga, mwàkènzà Nebùkàndànèèsà amu. Nènku kwibakabò kàleyi, Nimèlòòdà ngwàkiibaka. Bàvwa ne mukenji. Bàvwa ne ntempèlò. Bàbwa ne maèkèleeziyà. Bàvwa ne malongolodi. Bàvwa ne ndongolwelu yà malonga, ndongolwelu yà cyena màngumba, bàteeta kufikisha muntu kùdì Nzambi. Cyòci aci, kantu ne kantu kònsò, cyàkapangila. Necipangile misangu yònsò. Bikèngela kwalukila ànu ku Mashi meela panshi!

⁴¹ Mùshindù wà Nzambi wà kwenza cintu kanà cyònsò mmwakula mu Dîyì Dyèndè. Nènku Dîyi edi ndibuulula mu kaabujimà dyà Yesù Kilistò, kakwèna cintu nànsha cimwè cyà kusàkidilaKù anyi kuumushiibwaKù to. “Ewu yònsò udi ucyènta,” Bible mmwâmbè ne, “citùpà cyèndè necyùmushiibwe ku Mukàndà wa Mwoyi wà Mwànà wa mùkòòkò,” yèyè musàkidileKù kantu anyi muumùshileKù kantu. Dyangàtè wèwè ànu mùshindù ùdìDi difùndiibwe awu.

⁴² Bible kènà ùkèngela muntu nànsha umwe bwà kuMumvwija to, Nzambi ke Mudyùmvwiji wa Yèyè mwinè. Yèyè ùdi ùMumvwija pa kwenza ne cidiYe wàmba cyùle. Ke cidi cikòsa bwalu. Pùikalà Nzambi mmucyambè, ne Yèyè mucyenzè, s'kwàjiki. Kacyèna cikèngela mumvwiji to. Bible mmwâmbè ne: “Kì ndyà kumvwija mùshindù wà pàà nkààyebè to.”

⁴³ Mmùshindù wà Nzambi wà dicyènta! Ùtu ùshààla ne lulamatu kashidi ku cimanyinu Cyèndè citùma, cìvwaYe ùlonda ne dîyi Dyèndè; cyònsò, kwònsò eku, kùtù Nzambi ùtùma cimanyinu pa buloba eku. “Mpindyewu Nzambi kàtu wènta cintu nànsha cimwè to,” mùdì Bible mwâmbè, “pàdiYe kàyì mucileejè dyàmbedi basadidi Bèndè baprófetà to.” Mpindyewu aci, wèwè . . . Pùikalàbi ne aci ncyà mafi, dîbà adi bikwàbò byònsò abi mbyà mafi, nwamònu's. Yèyè kènà mwà kwenza cintu nànsha cimwè pàdiYe kàyì mwanji kucileeja to.

⁴⁴ Nènku mwena lùmònu awu, muprófetà, ùdi ne cyà kumanyishiibwa, bwà ne mèyi à biprófetà àdiye wàmba, tudi tujandula mu Nombà 12.6, bwà ne cidiye wàmba aci padici cyènzeka. Dîbà adi, citàbùùjaayi. Kàdì cyòci kaciyi cyènzèke to, dîbà adi kanùcitàbùùji to. Nènku cidi ne cyà kwikala bwà cyòci aci, Cyèndè. . . Nànsha yèyè mwâmbè cinyi, ne cyènzèke, ne cintu kanà cyònsò; pùikalàci kaciyi bilondèshile Dîyi to, dîbà adi cìcidi ànu cyà cibi. Cidi ne cyà kwikala ne Dîyi. Cidi ne cyà

kwikala citèèkùibwe mu bulongame ne Díyi bwà cimanyinu cyà cikondo aci, cikondo cidìbo ne mwoyi aci.

⁴⁵ Mpindyewu, eci cìvwa cilayìibwe kùdi Nzambi, bwà ne Yèyè úvwa ne cyà kusungila cisàmbà Cyèndè ne dibòkò dikolè. Mpindyewu, díbà didi Díyi edi, Yèyè kàvwa mubiikile mwakwidi kampànda to, Yèyè kàvwa mubiikile laabi kampànda to, Yèyè kàvwa mubiikile mwenji wa mikenji to. Wàkabiikila mulami wa mikòòkò, kuumumusha ku mukùnà, munyemakanyi, mulediibwe, mupròfetà mudyànjila kulongolola uvwa kàyì muswè mudimu wèndè to.

⁴⁶ Paùdi umvwa bantu bàjinga kwikala *cikampànda*, *cikansanga*, anyì *cikankènga*, cintu kampànda, tàngilàayi ànu cyanààna ne, Nzambi kàtukù ùkwàta naabò mudimu to. Nzambi úvwa ne cyà kulumbatangana ne Mòsà, bwà kumupeta. Úvwa ne cyà kulumbatangana ne Pòlò, bwà kumupeta. Yèyè. . . Mmuntu utu kàyì muswè kucyènta to, kàyì muswè bintu awu to; díbà adi Nzambi ùdi wàngata muntu awu, udi kàyì muswè kwenza awu, bwà Wàmòna mwà kuleejila butùmbi Bwèndè ku cyòci aci.

⁴⁷ Mpindyewu tàngilàayi. Cimanyinu cyònsò—cyònsò cilelèlà citùma kùdi Nzambi eci ncilondiibwe kùdi díyi. Mpindyewu nudi numòna kaaba aka, cyena-bwalu cidi. . . cimanyinu ne díyi. “Bòbò kabàyi biitabùùje díyi dyà cimanyinu cyà kumpàla to, díbà adi nebiitabuuje díyi dyà cimanyinu ciibìdi.” Mpindyewu, cimanyinu cidi ne díyi. Nènku, mpindyewu, cimanyinu cilelèlà cyònsò citùma kùdi Nzambi eci citu ne díyi, ne díyi adi didi ne cyà kwakula bilondèshile Díyi didi difidiibwe bwà dituku adi, ànu pyòpyòpò.

⁴⁸ Díyi dyòdi dilwa, díyi òm̀wèdimwè dyà kale adi dyà cìmwècìmwè cyà kale aci. . . Nudi numòna, anyì cimanyinu’s wè, ne cimanyinu cidi muntu awu wènza ciikale ngeelèlu wa meeji umweumwe wa kale awu, nènku nudi mwà kwamba ànu díbà adi ne: “Aci kacìvwa cìfùmina kùdi Nzambi to,” piikalàci citùngùnùke ne kuleeja ngeelèlu wa meeji umweumwe wa kale awu. Kacìvwakù cyà kùdiye to. Kacìvwakù cyà kùdiye nànsha. Ncìfwànyìne kwikala cìlwisha ndongamu wa Nzambi.

⁴⁹ Cidi ne cyà kwikala cintu kampànda cyà cipyacìpyà. Cidi ne cyà kwikala cintu kampànda cidi bantu kabàyi bùm̀vwa to. Cidi ne cyà. . . cyanààna kacìwa mwà kwikala citùm̀ibwe to. Kabyèna bikèngela kutùm̀ibwacì to, piikalàci cilongelu cìmwècìmwè cyàtèòlòjì cyà kale aci. Cidi ne cyà kwikala cintu kampànda cyà cishiilàngàne, kàdi cidi ne cyà kwikala cimanyishiibwe mu Díyi, ne ncyà ditùkù adi. Nwamònu’s, bijaadiki byà Díyi dyà Nzambi, cidi ne cyà kwikala cyòci aci. Kakwèna tulèma tukesè mu cyòci aci to. Cidi ne cyà kwikala Bulelèlà; cidi ne cyà kushindikiibwa kùdi Nzambi ne, m’Bulelèlà. Nènku muntu mwinè udi ubwàmba ùdi ne cyà

kwikala mushindikiibwe kùdì Nzambi, ne mmumònyì wa kwà Nzambi, cyànàànà ncyà mafi; kabèèna nànsha—kabèèna nànsha bacìmòna to, nànsha kakesè, kabèèna nànsha bàcìitabuujà to.

⁵⁰ Bimanyinu bidi—bidi bifùmìna kùdì Nzambi. Cimanyinu cìdì cilondà. . . Anyì, díyì dìdì dilonà cimanyinu dìdì ne cyà kwikala díyì dyà mukana mwà Nzambi dyàkwila ku Díyì, bwà cikondo aci. Nudi nuumvwa anyì?

⁵¹ Nzambi ùtu ùfila bimanyinu. CìdìYe ùbyènzela ncinyì? Misangu yònsò ùtu ùfila bimanyinu! Yèyè wàkabàmbila ne ki civwàbo bàMukèbelamù, bimanyinu. Nzambi ùdì ùfila bimanyinu bwà kukòka ntèmà yà bantu Bèndè. Mpindyewu twánjàâyì kulonga cyòcì eci, mu kantu ne kantu. Nwamònu's, bimanyinu mbifidiibwe bwà kukòka ntèmà yà bantu. Bwalu, dìbà dìdì cimanyinu citùma kùdì Nzambi cìfidiibwe, Nzambi ùkaadi pa kwakula. Nzambi ùkaadi pa kwakula, dìbà dìdì cimanyinu difidiibwe. Pìikalàcì cìfùmìna mu Dyulu, ncyà kwà Nzambi, ne Nzambi ùkaadi pa kwakula ne Yèyè ùdì ùteeta kukòka ntèmà yà bantu.

⁵² Ne Díyì dìdì dìlwa kùdì mupròfetà Wendè. Nènku mupròfetà ùdì ùmanyishiibwa ku cimanyinu cìdiye ùleeja, ne pashiishe ùdì ùlwa ku Díyì ne Díyì dìdì dimwènèshiibwe. Aci's ncikòse bwalu; kacyèna cikèngela dyumvwija nànsha dimwè to. Nzambi ùkaadi mumanè kucyùmvwija. Nwamònu's, mbipwàngàne ne mwàbì mwònsò.

⁵³ Mpindyewu mònaayi, Nzambi ùdì ùfila bimanyinu bwà kukòka ntèmà yà bantu.

⁵⁴ Apa, kiitwitu kàvwà kàlàkuka kapyà kàvwa cimanyinu bwà kukòka ntèmà yà mupròfetà; kiitwitu kàvwà kàlàkuka kapyà aku. Mòsà ùvwa, paanyimà pàà cipèèlà, ùdiisha mìkòòkò yèndè, mudiishi mununu wa mìkòòkò, bidimu makumi mwandamukùlù, mwedi mule; wènda ùya, ùlonda luseke lwà kajila kàà ciibidilu, mu dindà kampànda dyà munyà mukènùke, mìngà misangu. Nènku pashiishe, dyàkàmwè, kulwakù kiitwitu Kapyà, ne kiitwitu aku kakàvwa kàbùtuka to. Èè, cyònsò aci kacìvwa cyà ciibidilu to.

⁵⁵ Mpindyewu, Mòsà mwikàle mwena maalu à mamanya, bwalu, ùvwa mulongèshiibwe mu lungènyi lwònsò lwà beena Èjjiipitù, nènku bòbò bàvwa bamanyi banène kutàmba batùdì naabò leelù ewu aba; pa nàнку mu kwikala mwena dimanya aku, wàkamwèka bu ùvwa ùswa kwamba ne: “Mpindyewu nenyè nkamòne ne mmùshindù kaayi wà bin-. . . mushindà ùdìbo bapòngòlwèlè pa mabèji aa, ùdì wènza ne mucì wàwa kawèna ùteema to.” Nwamònu's, bu yèyè museemènekù mu mùshindù wà dimanya, kaDìvwa mwà kwikala dyakùle nèndè nànsha.

⁵⁶ Nènku ki mùdìbì kàbìdì leelù ewu, patùdì tuteeta kuseemena mu kalaasa ne dilonga dyà tulaasa, mu mùshindù wà maalu à mamanya, neupàngile Nzambi ntàntà wa kilòmèètà mùliyo

mujimà. Seemèna pabwîpi naaci bu Mòsà, ne bisàbàtà byèndè bikòpola; mudipwekèshe, mu didipwekèsha.

⁵⁷ Nènku, mpindyewu, kuvwa cimanyinu cyà kukòka ntèmà yà mupròfetà. Mpindyewu, mwaba awu, cimanyinu aci cidi ne cyà kwikala ne dīyī. Nènku pààkaakula dīyī adi, bu Dyôdī kadiyī dyà mu Mifundu to, ncyèna ngiitabuuja ne mupròfetà awu ùvwa mwà kwikala muditèèlèje to. Kàdi tângilàayi mùvwà dīyī òvwà dishindikija cimanyinu adi diikàle dyà mu Mifundu, dyàkajaadikibwa ne cìvwa n’Nzambì, bwalu Yèyè wàkamba ne: “Ndi muumvwe mikèmù yà cisàmbà Cyànyī, kàbidì Ndi muvùlùke mulayī Òmvwà mubenzèle.” Nwamònu’s, cimanyinu, pashìshe dīyī dyà mu Mifundu paanyimà pàà cimanyinu aci.

⁵⁸ Mpindyewu aci cidi cileeja menemene cingafumu ku diteeka bu nshindameenu aci. Cidi ne cyà kwikala cimanyinu cyà kùdì Nzambì, ne, pùikalàbi ne ncyôci, kùdì dīyī dyà mu Mifundu paanyimà pàà cyôci aci, bwà mulayī wa ditùkù adi. Kaciyī cilongelu cyà kale aci to; baa-laabi ne bikwàbò bàvwa bàpicila mu bilongelu abi, anyī bintu byònsò, mu ntàntà yònsò awu, mu ntàntà yònsò awu, baakwidi, ne bikwàbò. Kàdi eci ncintu cipyacipyà, ne cyôci mene ncyà mu Mifundu, mmulayī; ne cimanyinu bwà kukòka mupròfetà.

⁵⁹ Ki pashìshe, kwambaYè mpindyewu, kumpàlà kwà kuyayè kuntwaku, ùvwa ne cyà kwikala ne cintu kampànda cyà kudishindika naaci yèyè mwinè ne mupròfetà, nwamònu’s, kumpàla kwà kumwakidilabò. Yèyè ne: “Kabàakwamba ne Mukalenge mmumwènèkèlè to.”

⁶⁰ Yèyè ne: “Dìbà adi, Nènkupèshè bimanyinu bìbidì byà kwenza, nènku aci necìkokè ntèmà yà bantu. Nènku dìbà didì ntèmà yà bantu mikòkìibwe, dìbà adi ùbambìlè mèyī aa ne: ‘Mèmè ndi Nzambì wa Abraham, Izàkà ne Yakòbò, ne Ndi muvùlùke mulayī Wànyī.’ Nènku Ndi mukutùme kuntwaku bwà kubàsungila, nènku Nèngìikalè neebè.”

⁶¹ Nukààvwakù bamòne cimanyinu cyèndè cyà kumpàla anyī? Wàkapeta mìshindù yònsò yà ditentula. Muntu yònsò wàkateeta kwela nyòka panshì. Aci’s... Pùikalà aci kaciyī ciibidilu cyà bantu, ncyèna mumanyè cìdici to, nwamònu’s. Nwamònu anyī? Kàdi ndīyī dyà mùshindù kaayi dyàkapetabo paanyimà pàà cyôci aci? Cintu nànsha cìmwè; dīyī dyà cyena Èjiipitù dyà bàà buloba. Kàdi pààbò bàvwa mwà kwenza cimanyinu, kàdi kabàvwa ne dīyī paanyimà pààci to, bwà kucitwa mpàndà. Kàdi Mòsà ùvwa ne EMU MMÙDÌ MUKALENGÈ WÀMBA. Ki cìvwa dishìilangana ncyôci aci. Batentudi ndekeelu wa byònsò e kutungùnukabo ntàntà mule, kàdi ndekeelu wa byònsò byàkajima.

⁶² Nudi bamanyè ne Bible mmwàmbe ne necyènzekè cyàkàbidì mu matùkù à ndekeelu anyī? “Ànu mùvwà Yanè ne Yambèlè bakàndàmèene Mòsà amu, ke mwikalà bantu bàà meeji

mabèngiibwe pa bidì bitàngila Bulelèlà.” Nganyi udi Bulelèlà? Yesù Kilistò ùdi Bulelèlà. Nwamònu anyi? “Meeji mabèngiibwe pa bidì bitàngilà Bulelèlà.”

⁶³ Mpindyewu Yèhowàh neàkwile ku Díyì Dyèndè dilaya. Yéyè díbà adi ùdi ne cyà kulongolola mupròfetà ewu bwà kumutùma panshì. Bwalu, bitu misangu yònsò ànu nànkù mu ngeelèlù Wèndè wa meeji, ngeenzèlù Wèndè wa maalu, cikondo cyònsò ùdi ùtùma mupròfetà Wèndè ne Díyì, ne ùshindika mupròfeta awu.

⁶⁴ Kàbidì, eci ncimanyinu cilaya. Mupròfetà, yéyè mwinè, ncimanyinu. Bible ngudi mwambè nànkù. Panùdi numòna bikondo byènda bìpita, ne pashìishe numòna dilwa . . . Angàtaayi bwalu bulonda bwà Bible, nùbùlongè. Cikondo cyònsò cinùvwà bamòne cipòòlò cile cyà díbà; kàdi panùvwà bamòne mupròfetà ùmwènèka, cìvwa ncimanyinu cyà cilumbulwidi. Nzambì ùvwa ne cyà kulumbulwisha bàà pa buloba, pàvwàYe . . . anyi ditùnga, anyi bantu, panùvwà bamòne mupròfetà ùlwa apu. Mvwa muiishe diyiiisha pa cyòci aci, nwènu beedi bàà mikàbà yà méyi nudi bavùlùke, ci . . . *Cimanyinu Cilelèlà Cipanga Kumòna*. Bātu misangu yònsò ànu bàpanga kucimòna, bātu misangu yònsò ànu bàpanga kucimòna, kàdi cìvwa cimanyinu cyà dilwa dyà cilumbulwidi.

⁶⁵ Mpindyewu Díyì Dyèndè dìdi dyùle mu díyì Dyèndè dyà mukana. CìdiYe ùlaya aci, díbà adi Yéyè ùdi ùja Díyì Dyèndè ku díyì dyà mukana.

⁶⁶ Dilwa dyà mupròfetà dìdi cimanyinu cyà didimwisha dyà ne cilumbulwidi cidi pabwìpi. Ke mùtùbi misangu yònsò. Anyishaayi nteelèku cìmwè.

⁶⁷ Tàngilàayi Noà ùjuuka mu ndekeelu, mu—mu matùkù àvwa madyànjidile mvùlà yà Noà, mupròfetà wàmba cipròfetà. Cìvwa ncinyi aci? Cilumbulwidi cyàkатуuta dyàkàmwè pashìishe.

⁶⁸ Mòsà wàkabwela mu Èjiipitù, mupròfetà mushindika ne bimanyinu byà mupròfetà. Cyàkenzekà ncinyi? Dinyooka dyàkатуuta Èjiipitù dyàkàmwè.

⁶⁹ Eliyà wàkabwela mu cyalu, mupròfetà awu, ne wàkamba cipròfetà bwà Aakàbà ne ditùnga adi. Cyàkenzekà ncinyi? Dinyooka dyàkатуuta dyàkàmwè. Mmwómò.

⁷⁰ Yone Mubatiji wàkalwa, bu cimanyinu. Yéyè ùvwa mupròfetà. Yéyè ùvwa mupròfetà cimanyinu cìvwà cilwè pa buloba. Bàvwa bamanyè ne, pààkafikàye, Maasiyà ùvwa mwà kwakula, paanyimà pèndè. Cìvwa ne cyà kwikala nànkù, bwalu, bwà kupeta ba—bwà kupeta basungula.

⁷¹ Cìdi kwòkù mbwà kupeta cisàmbà cisungula cìdi cipàtuka, bu mu matùkù à Noà. Bu mu matùkù à—à Eliyà, binunu mwandamutekète anyi nkàmà mwandamutekète, anyi cyònsò cìvwàku aci, bàvwà kabàyi batwe binù byàbò panshì to, bwà kubàpàtula. Yone ùpàtula basungula, ne ùbàfila kùdì Kilistò

pààlwàYe, kutentemuna èkèleeziyà wendè, wàmba ne: “Mémè ndi ne cyà kukèèpela, Yéyè udi ne cyà kudyunda, bwalu,” wákamba ne: “Mémè ndi ànu dīyī dyà Ewu, udi wela lubilà mu cipèèlà ne: ‘longòlolaayi njila bwà Mukalenge.’” Nènku Yesù wàkalwa mu mùshindù ùmwèumwè awu. Kulongolola basungula bwà kutèèlejabò dīyī dyà Nzambi, ki cidi cimanyinu cyà cipròfetà aci. Kaa, nwènu balonde Mikenji eyi, mbwa kulongolola ba- . . .kulongolola basungula. Kī mbakwàbò to, kabààkucitèèleja to. Mbasungula ki bàdi babiikidiibwe.

⁷² Mwanjèlò awu wàkalwa penyī, mu Sodomà, wàkenza cimanyinu aci awu? Kùdì Abraham ne musumbà wendè. “Shààla kule ne Sodomà; neàkwate kapyà!” Nwamònu anyi? Yesù wàkalaya ne necyènzùluke, nudi bamanyè’s, cyàkàbidì, mu Sodomà. Mpindyewu mònaayi.

⁷³ Cidi cyènta cinyī? Cidi cìlongolola basungula bwà cisokomenu cyà Nzambi, bu mu cikondo cyà Noà, ne bikwàbò.

⁷⁴ Ciinè aci cidi cyènta cinyī? Cidi cipīisha beena bupidyà bàà meeji à mu mutù, ku cilumbulwidi. Ki mùtùci cyènta nànkù misangu yònsò. Bwà kudyombola luse, kakwèna cingà cintu cishààla to ànu cilumbulwidi. Nànkù cidi civwija mwena—mwena dimanya dyà mu mutù ne mwena bupidyà bakùmbànyīne cilumbulwidi. Bwalu, cidìbo bènza ncinyī? Bàdi bàcipīisha.

⁷⁵ Ki bwà cinyī beena Yudà bàakadyà musunya wàbò sungasunga. Ki bwà cinyī mashi àkatuuta nkòkà àpàtuka mu cimenga, cikondo civwà Titus, kalààlà kàà māsàlaayi kanène kàà cyena Loomò, mubwelèmu ne cilwilu, mbwalu bàvwa babènge Nyumà Mwimpè. Cilumbulwidi civwa ne cyà kulwa bwalu bàvwa baMwelùlwile. Yesù wàkabàmbila, pààkaMubiikilàbo ne Beelèzèbùlà, ne Yéyè wákamba ne: “Ndi nnùfwila luse,” difuta dyà cibawu kadivwa dyenjūbwe to, “kàdi,” mwàkambaye, “pààlwà Nyumà Mwimpè bwà kwenza cintu cimwècimwè aci, kwakula bibi Bwèndè kakwàdyàkufwidiibwakù luse to.” Ne lwólò lukòngò alu kalwàkafwidiibwaku luse bwà cyoci aci nànsha. Ncyà bushùwà.

⁷⁶ Cilumbulwidi kùdì mwena bupidyà! Ncitèèkiibwe mwaba awu bwà kiipacila aku, bwà kufila bukènkè kùdì mwena kwitabuuja, ne mīdimà kùdì mwena bupidyà. Ànu mùvwà Dikunji dyà Kapyà amu’s; Dyàkavwija bukènkè, bwà kusabuka kuya ku buloba bulaya, ne mīdimà kùdì aba bàvwà kabàyi biitàbùùjè to. Bimanyinu byà Nzambi bisòmbela byènta misangu yònsò ànu nànkù, bifofomija mèsù à beena bupidyà, ne bifila lumònu ne bukènkè bwà kwenda kùdì mwena kwitabuuja. Ki cidìbo babitùmine.

⁷⁷ Pīikalà cipròfetà cyèndè cilelèlà, pīikalà cipròfetà cyà mupròfetà awu ncilelèlà ne cikùmbana, dībà adi cidi didimwisha dyà Nzambi. Mpindyewu mu Nombà 12.6, tudì tusangana cintu cimwècimwè aci, mu Mifundu awu.

78 Bible wàkafùndiibwa kùdì bantu aba. Mpindyewu twétu babalè mu Peetèlò Mwibìdì 1.21, Mmwâmbè ne: “Bantu bàà kale, benzeja kùdì Nyumà Mwîmpè, bààkafùnda Bible.”

79 Kàbìdì mu Ebèlù 1.1, mwaba utùvwà baakùle dilòlò adi ne: “Nzambì, mu bikondo byà kale ne mu mîshindù mîshîlàngàne wàkaakwila ne baataatù kùdì bapròfetà, matùkù à ndekeelu aa kùdì Yesù Kilistò, Mwan’Èndè.”

80 Dikunji dyà Kapyà, cimanyinu aci; díyì. . . anyì—díyì òvwà ne cyà kwakula. Dikunji dyà Kapyà mu kiitwitu, cívwa díyì disungùlùke dyà ne Nzambì ùkaavwa pa kwakula.

81 Mònaayi mpindyewu bitòoke too, eci kacinùpici to. Dìbà òvwà Mìyàmà museke mwanààbò wa balùme, Mòsà, ne yèyè mwinè pèndè òvwà mupròfetà mukàjì dìbà dimùsekèlàyì adi, ne Nzambì wàkapweka mu Dikunji dyà Kapyà adi, Mòsà òvwà mumanyè ne Nzambì òvwà pabwîpì ne kwakula. Cívwa ncimanyinu. Ki díyì dyàkacìlonda, kwamba ne: “Kwènà ucìnakù Nzambì anyì?” Yèyè ne: “Kakwèna muntu nànsha umwe mu buloba bu musadidi Wanyì, Mòsà to.”

82 Wàkenza byà mwomùmwe pàakajuukàbo kwamba ne kùdì. . . Dìbà dyàkajuukà Datànà ne pàvwà Koolà, ne dimukàndameena dyà ne: “Kùdì bantu bàà cijila bààbúngì kukutàmba. Wèwè udi wela meeji ne wèwè udi ànu nkààyebè mu musùmbà ewu.” Nzambì òvwà mulongòlòle Mòsà bwà mudimu awu’s!

83 Kàdì dìbà dìjingilàbo bwà kupeta musùmbà mukwàbò wà kuyabò nawù, kudyènzabò bòbò biinè bulongolodi, Yèyè kwamba ne: “Tàpulukà naabò. Mémè nèm̀bàpìishè ànu cyanàànà. Nembàbùtùle ànu cyanàànà,” nènku Wàkacyèna. Buloba bwàkabàmina.

84 Mpindyewu tudi tusangana ne aci cìdì misangu yònsò ànu njila wa Nzambì. Dikunji dyà Kapyà dìleeja ne Díyì dìdì pabwîpì ne kwakula. Kaa, Texas, udi mwà kushààla mpofo wa mùshindù kaayi? S’ucìdì ànu muvùlùke Houston. Mpindyewu kùdì Díyì dilonda cimanyinu.

85 Mòsà, mupròfetà cimanyinu kùdì Izalèèlà, mulayiibwe ne Díyì dìdì pabwîpì bwà kwikala dishìndikìibwe.

86 Mùshindù mwinè wùdì Díyì dyà Nzambì dipwàngàne, mu bulongame, musangu wònsò! Ànu bu mùdì mene Ulimà Tumimà, mmùmvwà mubwambe, dilòlò adi. Ulimà Tumimà òvwakù, nènku pàdì cimanyinu aci kaciyì cilwè pa Ulimà Tumimà awu to, díyì kadìvwà dyànyìshiiibwa to. Bikèngela kwikalè cimanyinu. Cimanyinu cìdì cishìndika díyì. Ne díyì dìdì dishìndika cimanyinu, bwà ne cìdì cìfùmina kùdì Nzambì. Díyì dyà cimanyinu ndyòdì dìdì dyàmba ne “èyowà” anyì “to.” Pìikalà Nzambì mubènge cyòcì aci, dìbà adi Díyì dìdì dyàmba ne “to.” Pìikalàbì ne cimanyinu cìvwakù, Nzambì mwàmbe ne “èyowà.” Bulongame bwà Nzambì kabùtu bwànji kushintuluka kacya.

Tudi bafwànyine kushààla mèbà ne mèbà pa cyôci aci, kàdi kacya kabùtukù bushintùlùke nànsha.

⁸⁷ Tàngilàayi, Yona mupròfeta, tàngilàayi cimanyinu aci. Ùvwa mu njila mutàngile ku Taashishi. Kubangayè kuya ku Niniwè, ne kwangata njila wa—wa ku Taashishi. Bààbúngì bààkapiisha Yona. Yona kènà ùkùmbànyina kupiishibwa to. Yèyè ùvwa mupròfeta. “Bidyà byà mwakàne mbilombòdiibwe kùdi Mukalenge,” nènku ki kwikilayè mu njila wendè mutàngile ku Taashishi. Kàdi twètù tudi tuteeta kupiisha muntu awu, kàdi Yesù kààkamupiisha to.

⁸⁸ Mònaayi ne, Yèyè wàkamba ne: “Ànu mùvwa Yona mu difù dyà mushipa wà bàlenà, matùkù àsaatù à muunya ne à bufùkù,” cìvwa ne cyà kwikala cimanyinu, “ki mùdi Mwànà wa muntu ne cyà kwikala mu mwoyi wa buloba, matùkù àsaatù à muunya ne à bufùkù. Ne lukòngò lubi ne lwà masandi ndwólù elu lùkèba cimanyinu, ne kakwàkwikala cimanyinu cyàfidiibwà cyumukila kùdi Nzambi nànsha, vùlukàayi, ànu cimanyinu cyà Yona.” Cimanyinu cyà Yona ncinyi? Dibìikà dyà ku lufù. Nènku elu ke lukòngò alu lwà Sodomà, lwà masandi, masandi à mu nyumà, bè-... bènda masandi à mu nyumà bàlwisha Bulelèlà bwà Nzambi, bàBwèlulwila. “Lukòngò lwà beena lwonji ne lukòngò lwà masandi nelùkèbè cimanyinu, ne nebàcipetè, necìikalè cimanyinu cyà dibìikà dyà ku lufù.” Tàngilàayi, Yona. . .

⁸⁹ Bòbò bantu abu bàvwa bampàngaanù, ne cìvwa cinène. . . Cìvwa cimenga cyà bungèndààmùshingà. Cyapù cyàbò cinène cìvwa ndilòba. Bòbò bàvwa bàtùma mishipa mu ditùnga dijimà amu. Bantu abu bàvwa balòbì bàà mishipa. Ki cìvwà mudimu ncyôci aci. Ne bòbò bàvwa bampàngaanù, bàkuukwila nyama ne mpìngù, ne bààkalwa beena lwonji bàà dikèma.

⁹⁰ Bu mùdi ditùnga edi mpindyewu, ndyùlè tètè ne maalu à disangila dyà mulùme ne mukàji ne Hollywood, ne mishindù yònsò, nànsha too ne mu maèkèleeziyà. Mpindyewu tàngilàayi cidì cyènzeka. Mòna’s, mîngà misangu nànsha mene maalu à disangila dyà mulùme ne mukàji mu èkèleeziyà àkaadi àbìikidiibwa ne mbwena leelù. Mmunyi mùdi ditùnga edi mwà kutwàla cintu bu nànkù? Nùdibìikila nwènù biine munùdi beena Kilstò, kàdi nutùngunuka ne kwenza bintu bu nànkù, mmunyi mùdi aci mwà kushindama’s?

⁹¹ Bu mùdi mulunda wanyì mwîmpè, Jack Moore, mwàmbe kùkaadi bidimu ne: “Nzambi Yèyè ànu mulekèle ditùnga edi dipàndùke ku bwalu ebu, Yèyè neikalè mwenzèjìibwe, bu Nzambi mwakàne, bwà kubìisha Sodomà ne Gomòlà, ne kubàlòmba luse bwà dibàbùtula mu kapyà.”

⁹² Nwènù nuyàaya ku cilumbulwidi. Kakwèna mùshindù mukwàbò wà kuciitaba to. Cifùndaayi mu Bibles yènù amu. Nyèwù ngènda nkùlakaja. Numònè ní kadyàkuya ku cilumbulwidi. Mèmè mwà kwikala ne mwoyi kumana anyi

matùku, nencimòne, bwà mêmè mulààla matùku anyi ònsò. Ndambù mukwàbò wa bidimu neàcyelè patòòke.

⁹³ Yona. Bàvwa bapàtùke bònsò pambèlù bwà kulòba, dîbà dîipacila ku nkànkala, nènku ki nzambì wa mbù ewu pwàà, ùbànda, bàlenà, ùvùkuta lùbilu ku mwelelu wà màyi ùlùka mupròfetà ku mwelelu kwà màyi. Ncimanyinu kaayi aci's wè!

⁹⁴ Nzambì wàkafila mupròfetà Wendè, ne mukenji. Mpindyewu bàakamòna cimanyinu, bàdi bìitabuuja cimanyinu, mpindyewu mukenji ùdi cinyi? “Nyingàlàlaayi!” Ki dîyi dyà cimanyinu ndyòdi adi. Dîyi dyà cimanyinu didi ne: “Nyingàlàlaayi, cyanàànà munda mwà matùkù makumi ànaayi nenùbütudiibwè.” Bàvwa bamanyè bikumbàne bwà kunyingalalabò.

⁹⁵ Yesù wàkamba ne: “Nebàpiishè lukòngò elu, bwalu bàakanyingàlala ku diyiiisha dyà Yona; mutàmbe Yona bunène ùdi kaaba aka.”

⁹⁶ Dîyi dîvwa ne: “Nyingàlàlaayi, cyanàànà mu matùkù makumi ànaayi nenùbütukè.”

⁹⁷ Yone mupròfetà, ùmwènèka, cimanyinu cyà dimwènèka dyà mupròfetà, paanyimà pàà bidimu nkàmà yinaayi kabàyi ne mupròfetà to. Bàvwa ne beena mamanya à mu mitù bònsò abu. Ndi ànu ndifwànyikijila cimvundù cìvwàbo naaci! Bidimu nkàmà yinaayi, kakùyì mupròfetà, kàdi cikondo cyàkaseemena cìvwà Maasiyà ne cyàkulwa. Mpindyewu, Yone ùvwa cimanyinu, mwikàle mupròfetà, cyà ne Maasiyà ùvwa pabwìpi ne kwakula, dîyi dyà cimanyinu; bwalu, mu Maalàki 3, tudì tujandula ne: “Nèntumè müsànjeelà Wanyì kumpàla Kwànyi.” Eliyà ùvwa ne cyà kulwa kumpàla Kwèndè, ne Eliyà wàkalwa. Yone, mu nyumà ne bukolè byà Eliyà, wàkalwa e kwenza menemene ànu cìvwà Mifùndu myènzè, kàdi kabàakacyùm vwa to. Mifùndù yidi yàmba nànkù. Yèyè ùvwa cimanyinu, cimanyinu cyà mupròfetà, cyà ne Maasiyà ùvwa mwà kwakula.

⁹⁸ Mupròfetà awu, mucimanyè bîmpè menemene, too ne pàakambàye ne: “Mòna's, kùdi Umwe mwimàne munkaci mwènù, mpindyewu mene. Maasiyà ùndi ngàmba awu, ùdi munkaci mwènù emu. Ncyèná nkùmbana bwà kusùulula nshinga yà bisàbaatà Byèndè nànsha. Yèyè Awu ke wàbàtiiza ne Nyumà Mwîmpè ne Kapyà. Ndi munkaci mwà kubàtiiza ne màyi, bwà kanyinganyinga, kàdi Yèyè neikalè paanyimà pàà mêmè. Yèyè ùdi munkaci mwènù mpindyewu.”

⁹⁹ Dîngà ditùkù e kumònayè Nsongàalùmè ùlwa, wènda ùpweka. Wàkamòna Dikunji dyà Kapyà adi, mu mmwènèkelu wa Nkuci, dipweka difùmina mu Dyulu; Dîyi, dyàmba ne: “Ewu m'Mwan'Àanyi munanga, mu Yèyè Mmùndì musànkile bwà kusòmba.” Wàmba ne: “Mmùndì musànkile bwà kusòmba,” cidi ànu mwàkù wà pa mwandà kumpàlà kwà mupinganyi, nànkù cidi ànu cintu cìmwècimwè. “Mu Ewu Mùndì nsànka bwà

kusòmba,” anyi, “Mwena munda Mûndi nsànka bwà kusòmba,” kàbyèna ne dishiilàngana nànsha dikesè to. Mònaayi ne: “Ndi nsànka bwà kusòmba munda Mwèndè.”

¹⁰⁰ Yone wàkamba ne: “Ndi mfla bujaadiki bwà ne Yèyè ùvwa mungambile mu cipèèlà,” kî nku sèminèrè to, “mu cipèèlà, wàmba ne: ‘Pa Ewu uwàmònà Nyumà ùpwekela, ne ùshààlapù awu,’ amen: ‘Yèyè Awu ke wàbàtiiza ne Nyumà Mwîmpè ne Kapyà awu.’ Ki mèmè kufila bujaadiki ne m’Bulelèlà.”

¹⁰¹ Cìvwa ncinyi aci? Mupròfetà awu ùvwa cimanyinu cyà ne Maasiyà mmudìlongòlòle bwà kwakula.

¹⁰² Maasiyà ùvwa cinyi? Maasiyà ùvwa Dìyì, mu kaabujimà. Ùvwa kaabujimà kàà Nzambi. Bapròfetà bàvwa m’Bukênkè bukesè bùvwà bùbàlakana. Kàdi munda Mwèndè mùvwa Bukênkè bwònsò abu, bùvwa mu Maasiyà ewu, bwalu Yèyè ùvwa Nzambi mumwènèshìibwe, muvwijìibwe Èmanùwèlè, Nzambi munkaci mwètù mu mubidi wà buntu.

¹⁰³ Maasiyà ùvwa mudìlongòlòle bwà kwakula. Nènku mònaayi ne, Bible ùdi wàmba, ne: “Dìyì dyà Mukalenge didi dilwa kùdi mupròfetà.”

¹⁰⁴ Mpindyewu ki Yone ewu mwimàne, uvwa Yesù mwàmbè ne ùvwa “mupròfetà mutàmbe bunène wa kacya uvwakù.” Yesù ngudi mwambè nàнку, Maatàayi nshapità wa 11 ne: “Ncinyi cinùvwà bayè kamòna, muntu munyùkusha kùdi cipeepèlè kanà cyònsò, *edi* dingumba didi dyàmba ne: ‘Nenkupèèshè byàbùngi; wèwè mwenze ànu *eci* anyi?’ Kî n’Yone to! To, to. Muntu udibò mwà kusàkila, musàkiibwe pambèlu anyi? To, ùvwa mupròfetà mupapè, mukàyabàle. Nuvwa bayè kamòna muntu muvwàle ne ku ménù bivwàlù byà bwakwidi anyi?” Ki Yèyè kwamba ne: “To, bàtu bàsòmba mu nzùbù yà mabàlaasà yà baamfùmù. Bàtu bàswika dibàkà dyà bansongà, bàtwa bàna bàà mu mabòko mishiku, ne bàjiika banunu. Ki bàà mùshindù awu. Kî mbamanyè kantu nànsha kàmwè pa Mwèlè wà mvità wà nseke yìbidi to. Kàdi ncinyi cinùvwà bayè kamòna, mupròfetà anyi?” Yèyè ne: “Mutàmba ne mupròfetà’s!” Mu bushùwà bwà bwalu, yèyè nguvwa mùsànjeelà wa Cipungidi, uvwa Nzambi mulayè bwà kumutuma.

¹⁰⁵ Nènku mònaayi mwaba ewu ne, Yone mwimàne mu mâyi, munkaci mwà kubàtiiza, wàmba ne: “Yèyè ùlwalwa.”

¹⁰⁶ Kàdi ki Dìyì edi pwàà, kadìyì kàbìdì mu Dyulu to, kàdi divwìjìibwe mubidi. Dìyì didi musunya, dibà adi ncinyi cidì cyènzeka? Bulongame bwà Mifundù yà Nzambi bùdi cinyi? Dìyì dyàkalwa kùdi mupròfetà, ànu mu cipèèlà amu, ànu mu ciinà cyà mâyi amu. Dìyì dyàkalwa kùdi mupròfetà.

¹⁰⁷ Yone wàkatàngila muulu, e kwambayè ne: “Mèmè ndi nkèngela kubàtìjìibwa kùdi Wèwè.”

108 Kàdi munanga wanyì, mwanèètu mununu, Docteur Davis, wa mu èkèleeziyà wa ba-Baptistes wa Bamissionaires, wàkambàtiiza mu diitabuuja dyà beena Kilistò awu, ní ùdikù mwà kwikala mwab'ewu dilòòlò edi, ncyènà njinga kumutàpa ku mwoyi to. Bwalu, yéyè ùtu musòmbèle muneemu mu Texas emu, ùdi pambèlù apa ùùmukila ku Davis Mountains. Kàdi ndi mvùluka ne tuvwa tukòkangana nendè ditùkù adi, dîbà adi mèmè ncívwa nsongà. Ki mèmè kwamba ne: “Kacyèna cyùmvwika cijaalàme to, Docteur Davis.”

109 Yéyè ne: “Cyàkenzekà ncinyì, dîbà adi Yesù wàkabàtiiza Yone, ne pashiishe Yone wàkabàtiiza Yesù, bwalu Yone kàvwa mubàtijiibwe to.” Kacívwa cyùmvwika cijaalàme kùndi to.

110 Ki mèmè kutùngunuka ne kwindila, nkenketa, ndikonka. Ncívwa mufwànyine kwamba cintu nànsha cimwè pa bwalu abu to, kàdi dîngà ditùkù pàakacibuululà Mukalenge.

111 Mpindyewu tàngilàayi nùmonè cìdi Yesù mwambè. Yone wàkamba ne: “Mèmè ngudi dijinga ne kubàtijiibwa Kùdi, kàdi bwà cinyì Wèwè ulwàlwa kùndi mèmè?”

112 Yesù kwamba ne: “Itàbà bìikalè nùнку, bwalu butùdi naabù mbwà kukùmbaja bwakàne bwònsò.”

113 Yone ùvwa mumanyè ne Yéyè ùvwa Nganyi. Ki balombodi bàbìdì bàà buloba abu, balombodi bàbìdì bàà èkèleeziyà, Nzambì ne mupròfetà Wendè, biimàne pàmwè. Mpindyewu, tàngilàayi, bìvwa bikèngela bwà kumanyabò.

114 Yesù wàkamba ne: “Itaba bwà aci cìikalè nàнку, ncyà bushùwà, kàdi butùdi naabù mbwà kukùmbaja bwakàne bwònsò, Díyì dilaya.”

115 Bìvwa bikèngela bwà Mulàmbù kusukudiibwawù kumpàlà kwà kufidiibwawù. Yone wàkabàtiiza Yesù bwalu Yéyè nguvwa Mulàmbù. Nwamònu anyì? Bìvwa bikèngela bwà Mulàmbù kusukudiibwawù kumpàlà kwà kufidiibwawù. Kuseemenayè ànu buludi, ke Mulàmbù kusukudiibwawù, pashiishe Mmuleejiibwe byakàne. Yéyè ne: “Awu m'Mwànà wa mùkòòko wà Nzambì.”

116 Wàkabànda buludì ku mwelelu wa màyi, ne ki Nyumà wa Nzambì kupwekayè pambidi Pèndè, kwamba ne: “Ewu m'Mwan'Àanyi munanga.” Nwamònu's, Wàkaleejiibwa dîbà adi kùdi bantu bònsò. Kàdi kumpàlà kwà Mulàmbù kwikalawù muleejiibwe, ùvwa ne cyà kwanji kusukudiibwa dyàmbedi; awu mmukenji wà Dipungila Dikùlukulu. Mmwòmò.

117 Maasiyà ùvwa pabwìpì ne kwakula, bwalu cyòci aci ke cívwa cimanyinu cyà mupròfetà. Nènku pààkamònàbo mupròfetà awu ùlwa mu cyalu, paanyimà pàà bidimu byònsò nkàmà yinaayi abi byà kabàyi nànsha ne umwe to, bàvwa bamanyè, díyì divwà dilonda divwa m'Maasiyà.

118 Mpindyewu nwênù babadi bàà Bible elàayi meeji bikolè bwà tusunsa ndambù. Batàngìle ngiikàdilù wendè, mmunyi mwà kamupangilàbo? Mmunyi mwàkapangàbo kumanya ne ùvwa nyèyè, Yone? Ngiikàdilù wendè ùvwa mumanyishiibwe, nyumà wendè ne ngiikàdilù wendè bivwa bimanyishiibwe ne yèyè ng'Elìyà. Mpindyewu mōnaayi nyumà wa mùshindù awu. Mpindyewu, yèyè ùvwa Yone Mubàtiji, kàdi nyumà wa Elìyà ùvwa pambidi pèndè.

119 Mōnaayi ne, dyàmbedi, Elìyà ùvwa muntu uvwa munange cipèèlà. Nwamònu anyi? Ne Yone ùvwa muntu mu cipèèlà.

120 Ne Elìyà ùvwa muntu wàkapiisha ndongolwelu wa bulongolodi awu, mu ditùkù adi, ne byònsò bivwàye naabi. Ke mwàkenzà Yone nànkù ne: “Nwênù lukongo lwà nyòka. Udi munùdimwije bwà kunyeema cijji cìkolè aci nganyi? Kanùbangi kwamba ne: ‘Ndi ne *cikampànda*, *cikansanga*, anyi *cikankènga to*.’ Nzambi ùdi ne bukolè bwà ku mabwe aa kujuudila Abraham bàna.” Nudi numòna ngiikàdilù yìbìdi anyi?

121 Kàdi tàngilàayi Elìyà, wàkapiisha ba-Izàbèlà bónsò bàvwà badilaabè bilaabu kwìsù bàà dyèndè ditùkù, bakàjì bàà masandì abu. Yone wakenza cinyi? Cintu cimwècimwè aci, bwà Helòodyàsà. Bùbìdi bwàbù, ke cìvwa cibàkèbèle lufù aci's.

122 Tàngilàayi Elìyà, paanyimà pàà yèyè mumanè kwenza mudimu munène awu, ùvwa mubindùlùke, mulààle pambèlu apu ne kulòmba Nzambi bwà kumwángatayè. Yone wàkenza byà mwomùmwe, ùvwa mene mulààle kuntwaku e kutùmaye bayiidi bèndè, wàmba ne: “Ndàayi nùMukonke. N'Yèyè Awu anyi twindilè mukwàbò?” Yesu ùvwa mumanyè cyòci aci.

123 Yèyè ùvwa Elìyà. Aci cìvwa ne cyà kwikala ngiikàdilù wendè. Yèyè wàkamanishiibwa ànu menemene mùvwà Elìyà amu. Ùvwa mu nyumà wa Elìyà.

124 Ùdi ne cyà kulwa misangu yìtaanu, nyumà awu, bwà kukwàtabò nendè mudimu kùdi: Elìyà, Elishà, Yone, Maalàkì 4, ne pashiishe bwà beena Yudà. Matùkù à ndekeelu, tudimù dilòòlò edi, nyumà wa Elìyà. Mōnaayi mpindyewu.

125 Leelù ewu, ndi muswè bwà nwênù kutàngila bapròfetà bèètù bàà cyena leelù bàà Aakàbà aba, bàlekela ba-Izàbèlà bààbò bàkosa nsuki yàbò, bàlaaba bilaabu kwìsù kwàbò, bàvwàla tùpùtulu, bànwà mfwankà, cintu kanà cyònsò ne: “Ncìmpè.” Bèètù-bèètù bapròfetà bàà Aakàbà bàà leelù ewu, bènda bàlonda bilongelu byàbò abi, ncyà bushùwà, bàbàlombwela ku twitabàayi myenza kùdi bantu ne màngumba. Ncinyi aci? Bapròfetà bàà Aakàbà.

126 Bìdi bitùkèngela mukwàbò Miikà bwà kujuukayè mu cyalu. Anyi mu cikondo cyà Aakàbà, Elìyà wàkalwa mu cyalu. Ki yèyè awu, mulayiibwe.

127 Wènda ùbàlombola, mu mùshindù wònsò uvwabò baswè kuya awu. Bòbò kabàyi baswè to, kubàkèngesha mwab'ewu mu mwaba kampànda, nebàye kuntwaku ne kukalamakana ku *eci* ne kushààla ànu ne dyàbò—dyàbò—dyàbò dijìkula dyà bwena Kilistò adi.

128 Èè, kabàtu kacya basungìdìibwe nànsha, ànu kwìnè kwònsò aku. Ngiikàdìlù wabò mene ngudi ucishindika. Nudikù mwà kupòòla tumuma twà mvinyò ku mucì wà mèbà anyi? Nudi mwà kupòòla bibimbi ku mwonjì wà mawòji anyi? Ngiikàdìlù mene ngudi uleeja ne kî mbaswè kantu nànsha kàmwè kàà ku Díyì to. Bàdi bàDyelulwila, ne bàDipenda. Pàdìci cìfùnda ne: “EMU MMÙDÌ MUKALENGE WÀMBA, bintu ebi bidì ne cyà kwenzeka,” kàdi bàdi bàDiseka, bàDyelulwila.

129 Kabyèna bikèmesha to pàakambà Yesù ne: “Mukalenge-mukàjì wa ku Sud neajuukè ne lukòngò elu, mu matùkù à ndekeelu, ne kulùpiisha; bwàlu yèyè wàkafuma ku ntengu yà buloba, bwà kumòna muntu mwikàle ne dipà dyà lungènyi.” Yèyè kwamba ne: “Munène kutàmba Solòmò ùdi kaaba aka.” Ncyà bushùwà. Solòmò ùvwa, mu dyèndè ditùkù, òvwa òmwè dyà ku matùkù manène. Bantu bònsò bààkiitabuuja dipà edi òvwa Nzambì mubàpe, Solòmò ewu, ne lwèndè—lwèndè luumù lwàkaya myaba yònsò. Kàdi ambaayi túng bu twètù bantu bàà ditùkù edi. . .

130 Kàdi twètù beena Àmèrikè, tudi misangu yònsò ànu tuteeta bwà kupeta ndongamu kampànda bwà kulwisha communisme. Ndongamu wa Nzambì *nyèyè ewu* ne: “Nyingàlàlaayi! Alùkilaayi kùdì Nzambì!” Ku ndongamu kampànda anyi? Bòbò ànu badìdinge bènze Cyòci aci, tudi mwà kupwà communisme mwoyi.

131 Cikondo civwà Izalèlèlà mujimà mwitabuuje dipà òvwa Nzambì mubàpe. Bu Àmèrikè mwà kufila ànu. . . kwitabuuja dipà dìdì Nzambì mutùpèeshe adi, matùkù à ndekeelu aa, Mwan'Èndè, mu mmwènekèlu wa Nyumà Mwìmpè, mubiike ku bafwè, mwikàle ne mwoyi munkaci mwètù bilondèshile mulayi Wèndè. Bu twètù ànu mwà kunanga Aci's wè!

132 Nediye ànu kùdì Basungula. “Bwalu muntu nànsha umwe kèna mwà kulwa kùNdi pàdi Taatù Wanyì kàyì mumukòke to. Ne bònsò bàdi Taatù Mumpèeshe, nebàlwe.” Ànu dimyamina dyà dimiinu; dìdì òmata, òngà *elu* luseke ne *lwàlwa* luseke, kàdi kùdì dimyamina dyà dimiinu, mu mùshindù kanà wònsò. Nedyèlè miji yàadi mwaba kanà wònsò ùdìdì disanganyiibwa. Nebàdibàkulè.

133 Mònaayi ne, ki bòbò aba, ne tudi tujandula ne mu ditùkù adi, Aakàbà, ditùnga dikaavwa difikisha beena Izalèlèlà abu ku dyanza dyà bintu byà mùshindù kanà wònsò bìvwàbo baswè kwenza, cikòlà bàjikula ànu mùvwàbo beena Izalèlèlà.

134 Mùshindù wàkapiishà Eliyà lukòngò alu, ne byònsò bìvwà munda mwèndè abi, ne Nzambi wàkamushindika. Ne yèyè ùvwà mupròfetà.

135 Ànu kumpàla mene kwà dilwa, ke mwàkenzà Yone! Kujuukayè ànu mu Izalèlèlà amu. . . Ùvwà musèla mukàjì ewu wa—wa Helò-. . . wa Helòòdè, mukàjì wa mwanààbò Filipino. Kujuukayè mumutàngile ànu mu mpàla; kàkashikunkila to. Kàvwa ne bwòwà bwà ne mukùlù kampànda ùvwà ùmwipata nànsha. Kàvwa ne kartà kàà bwobùmwè; ànu ne Nzambi. Yèyè ùvwà mupròfetà Wendè. Dìyì òvwà nendè. Yèyè kàvwa ne cyà kuya kakonka mwèpiskòpò anyi balami to. Ùvwà mulabiibwe. Ùvwà ne Dìyì. Wàkaya buludi mumpàla mwèndè, e kwamba ne: “Mikenji kì mmikwanyishile bwà wèwè kwikala nendè nànsha!” Mmwómò. Kàkashikunkila, kùdì muntu nànsha umwe to.

Bakàjì bàà lwonji abu bènda masandi, benza maalu à lukutukutu!

136 Ànu bu Amòsà, pààkalwàye mu cyalu, kutàngilaye kuntwaku. Katwènà nànsha bamanyè kùdiye mufùmìne to. Ekèlekèlè, mùshindù mwinè ùvwàye ne cyà kwikala mutàngile pa cimenga cyà Sàmaalèyà aci's wè! Ànu mùvwà beena lwendu lwà dibandila bènzè, byònsò bilenga be, ne bayiishi bònsò mu dyumvwangana ne—ne matùnga, ne nsangilu wa matùnga ne bantu bònsò, cikòlà biikàlè bènda ànu mu mpèkaatu! Mèsù èndè kukèèpelawù, mutù wèndè wà dibàla awu kukenka, nènku ke mùshindù wàkapwekàye nànkù. Kàvwa. . . kàvwa wa kutàmba kutàngila to, kàdì ùvwà ne EMU MMÜDÌ MUKALENGE WÀMBA.

137 Tudi tukèngela Amòsà mu cyalu leelù ewu. Tudikù mwà kumwakidila anyi? To nànsha kakesè, ànu mùvwàye amu. Ùvwà mwà kulwa mu cyalu, ùvwà mwà kupandakaja dìnà bulongolodi bwònsò, dìngumba ne dìngumba dyònsò, mukàjì yònsò muvwàdi wa tùpùtulu, Izabèlè yònsò mubebudi wa nsukì. Ùvwà mwà kubàsùnsululakaja. Bàvwa bafwànyìne kumwipata mu mùsèsù, bàmba ne: “Mukùlākàjì mukoleshi wa maalu awu!” Kàdì yèyè ùvwà mufwànyìne kwikala ne EMU MMÜDÌ MUKALENGE WÀMBA, bwalu mbifùnda ànu mùshindù awu. Dìngumba adi dyàkamwakidila anyi? To.

138 Kàvwa ne muntu nànsha umwe wa kutùdila ndongamu wèndè mfranga nànsha. Cimenga cinène, cilenga cyà—cyà lukùkà eci, bu mùvwà Sàmaalèyà amu, bàvwakù mwà kwakidila kalùmuyàànà kakàyi kamanyìke aka kakàyi ne kartà kàà bwobùmwè nànsha kàmwè, kakàyi muntu wa kukàtùdila mfranga, anyi ní ncinyi cyònsò anyi? Kàvwa ne bulongolodi bwà dimutùdila mfrangà to. Kàvwa ne kartà kàà bwobùmwè to, kàvwa ne cilongelu cìvwàye mufùmìne to. Kàdì ùvwà ne EMU MMÜDÌ MUKALENGE WÀMBA. Ne dilwa dyèndè, bu mupròfetà, òvwà ncimanyinu. Dìyì dyèndè òvwà difùmìna kùdì

Nzambì, ne òwà dimanyike mu matùkù à Yelòboàma Mwibìdì. Cintu cyònsò civwàye mwambe cyàkakumbàna.

139 Mpindyewu tudi tusangana ne, ditùkù ditùdì ne mwoyi edi, cìdì ànu dyambuludiibwa dyà cyòcì aci kàbìdì. Bambi ne cisàmbà, biikàle ne bundù bwà kwimana mu cyambilu, ne È—Èvànjeeliyò wàshàadi ticket wa byàkudyà kùdìbo. Bàdì ne bwòwà bwà kwamba ní ncinyi cyònsò, muntu kampànda neàbiipàte mu *cikampànda*, *cikansanga*, anyi *cikankènga*.

140 Kùdì ànu Muntu umwe udi mwà kukwipata mu Dyulu, mwinè awu's n'Nzambì. Nènku mmunyi muwìpaciibwa mu Dyulu, paùdì mushàale ne Díyi Dyèndè? Dyòdì adi's ke cìdìYe mukutùmìne.

141 Vùlukàayi ne, Bible mmwambè, mu cikondo cyà bwenà cyà mùvwàbì mu matùkù à Eliyà, mu ditùkù dyà mùshindù wàkadìbì mu matùkù à Yone, bwà ne Maalàkì 4 neàpinganè cyàkàbìdì pa buloba. “Nèntumè Eliyà.”

142 Mpindyewu kanùbwejakaji cyòcì aci ne Maalàkì 3 to, “Ndi ntùma mùsànjeelà Wanyi kumpàla Kwànyi.” Awu ùvwa Eliyà, pèndè.

143 Kàdì mu Maalàkì 4, Yèyè wàkamba ne: “Ànu kumpàlà mene kwà Ditùkù dinène ne dyà dikwàcisha bwòwà dyà Mukalenge kulwadi, piikalà buloba bujimà ne cyà kuteema bu cikùtù cyà kapyà, ne baakàne nebèndelè pa butù bwà babì,” ki Bukalenge bwà bidimu cinunu abu's: “Nèntumè Eliyà mupròfetà.” Kàdì ncinyi cyènzàye? “Yèyè neàluje diitabuuja dyà bàna kùdì baataatù bàpostòlò,” kubàaluja ku Díyi. Nebikèngele bwà yèyè kwikala mupròfetà. “Mémè nèmmutùmè.” Neikalè mumanyìshìibwè ànu byà menemene. Ngiikàdilù wèndè neikalè ùmwèùmwe awu ànu mùvwà Eliyà amu, pyòpyopyò. Mukenji Wèndè newikalè ànu mu njila awu. Yèyè neàpiishe, neàshimbulè. Kakùyì bwobùmwe to, kakùyì dyelangana dyà dibòko to, kakùyì cintu nànsha cimwè to, kàdì yèyè neikalè ne EMU MMÜDÌ MUKALENGA WÀMBA.

144 Mpindyewu, vùlukàayi ne, kùdì bisumbù byà mishindù yònsò bìimanyina kuulu byàmba ne: “*Ewu* ke mùzàbì wa Eliyà, ne *eci* ke dilongesha dyà Eliyà.” Cisumbù cyònsò mu kaabujimà, bulongolodi kampànda, mbubwèlè mu cisumbù cyà Eliyà, anyi mùzàbì wà Eliyà. Aci's kí m'Mufundu to. Kacya Nzambì kàtukù mwanji kukwàta mudimu ne cisumbù mùshindù awu to.

145 Pàakalwà Eliyà mu cyalu, ne Yone Mubàtiji, bònsò bàbìdì bààkapiisha bisumbù ne bulongolodi. Bòbò kacya kabàvwa bacyenzè to. Yèyè ùdì ùbàpiisha, mùshindù ùvwàbo bènze; Eliyà ne Yone, bùbìdì bwàbò. Kaci'yì cisumbù anyi dìngumba nànsha. Kàdì bubìdì bwàbò, mu bikondo byàbò bìbìdì, bààkapiisha bisumbù ne malongolodi.

146 Ncinyi dībà adi? Cimanyinu cyà cikondo cyà nshìkidilu necifile cyà bushùwà menemene Díyi dyà cikondo cyà

nshìikidilu. Eliyà ùdi ne cyà kulwa mu cyalu, muntu mulaaba ne nyumà awu; muntu wa mwitu, ne bikwàbò, ne munangi wa cyôci aci, ne ùlwa mu cyalu bwà kushindika. Mpindyewu tàngilàayi cìdi Mufùndù wàmba mpindyewu, nènku dìbà adi kanwàkuseeswishibwa to, nwamònu's, cimanyinu cyà cikondo cyà nshìikidilu ne Dìyi dya cikondo cyà nshìikidilu.

¹⁴⁷ Kacya Nzambì kàtukù mwanji kukwàta mudimu ne cisùmbù to, mwaba nànsha ùmwè mu Mifùndu. Ùtu ùkwàta mudimu ne muntu nkààyà, bwalu muntu yònsò mmushìilàngàne ne mukwàbò. Muntu yònsò ewu, minu yà byàlà byètù ebi mmishìilàngàne, maùlù ètù mmashìilàngàne, byenzeni byètù mbishìilàngàne. Yèyè ùdi wàngata muntu umwe, Ùdi mwà kumubweja mu dymvwangana menemene too ne mùdiye mwà kushààla Dìyi adi.

¹⁴⁸ Ki bwà cinyi Pòlò, wàkamba ne: “Bwà ncilu kubàndishibwa muulu bwà búngì bwà Dibuulula, bàakampèsha mùsànjeelà wa Sàtaanà.” Nwamònu anyi? Maatàayi mmufunde, Luuka mmufunde, Maako mmufunde, bònsò bwàbò, kàdi, bàakalonda ànu Yesù ne kufùnda byàkambàYe. Kàdi Pòlò ùvwa ne dibuulula dya ne Yèyè uvwa Nganyi, nwamònu's, ki cintu cyà—cyàkamònaye. Dibuulula dyèndè òvwa dinène menemene, Wàkamulekela ùfùnda Bible, bu Mòsà wa Dipungila Dikulùkulu awu. Muntu munène awu, Pòlò, dibuulula òvwa naadi adi, ùvwa mumanyè ne Yesù wa Dipungila Dipyadipyà awu ùvwa Yèhowàh wa dya Kale awu. Ùvwa ne dibuulula dyaCi, ne ùvwa mwà kuditàkela beena Ebèlù, kùdi...ne kùdi—kùdi beena Loomò kàbidì, ne kùdi beena Efèsò, ne—ne bònsò. Yèyè—yèyè wàkafùnda mikàndà eyi. Mònaayi ne, paanyimà pàà cimanyinu Cyèndè cimanè kupàtuka, pashiishe kufùndaye mikàndà.

¹⁴⁹ Ngikàdilù wa dilwa ewu neikalè wa mwomùmwè awu. Kacyàkwikala cisùmbù to. Necìikalè muntu umwèpelè. Nzambì kacya kàtu mukwàte mudimu mu munga mùshindù to ànu ne muntu umwèpelè. Mpindyewu, Eliyà kàvwa cisùmbù to, Yone Mubatiiji kàvwa cisùmbù to, bàvwa muntu-nkààyà. Nzambì, Maalàki 4, kèna wàmba ne: “Nèntumè cisùmbù to.” Yèyè mwàmbè ne: “Nèntumè Eliyà!” Dìyi kadyèna mwà kushintuludiibwa to.

¹⁵⁰ Mpindyewu, tàngilàayi, cimanyinu cyà ndekeelu ne Dìyi nebilwe mu bulongàme bwà Mifùndu ànu mùvwàbi bilayìibwe amu.

¹⁵¹ Tudi baswè kumanya cìikalà cimanyinu cyà nshìikidilu anyi? Yesù mmutwàmbile, mu Maatàayi 24 ne 25. Mmutwàmbile, kàbidì, mu Bwàkabuulwibwà, kubangila ànu ku mwi6...anyi wa 1, tuya too ne, èè, ku nshapità wa 10. Pashiishe Yèyè ùdi ùlwa mu nshapità wa 19, Bukalenge bwà bidimu cinunu bùbangila mu dilwa Dyèndè, mubànde pa kabalù katòòke.

152 Necilwe, cimanyinu cyà cikondo cyà nshìikidilu, mpindyewu tèèlejàayi, bwà kujikija, necilwe ànu menemene mùshindù ùdi Mufùndu wamba. Mpindyewu mònaayi Dîyì dyà cimanyinu.

153 Mpindyewu, Yesù, mu Luukà 17.30, wàkalaya cimanyinu cyà cikondo cyà nshìikidilu. Cimanyinu cyà ndekeelu, civwa n'Nzambì mumwènèshìibwe mu mubidi wà buntu ùvwà mwà kujingulula meeji àvwà mu meeji à Sarah, mu ntentà paanyimà pèndè apu. Ki cyàkambàYe ncyôci aci. Aci's ke cimanyinu cyàkalayàYe ku ndekeelu. Àn-...Ncinyi cyàkambàYe ne necyenzè? “Ncifwànyine kumanyika mu matùkù, matùkù à ndekeelu, pàabuuludiibwà Mwànà wa muntu.” Kwikala mubuuludiibwe! Dìbà didi Mwànà wa muntu mubuluudiibwe, aci neciikale cimanyinu cyàbuuludiibwàYekù. Mpindyewu tàngilàayi Aci ní kacỳèna cyàmba aci. Bulelèlè menemene cidi cyàmba.

154 Mpindyewu udi mufwànyine kwamba, ne: “To, neciikalè cintu kampànda cikwàbò. To, neciikale kwibaka nzùbu munène, *cikampànda* cinène, anyi *cikansanga*, anyi nsangilu kampànda munène wa maalu à ntèndeleeu, anyi *cikampànda* anyi?” Kaa, to. To, aci cikaadi cimanè kupita kale. Aci cidi luseke lukwàbò. Cidi cibèngangana ne civwà Nzambì mwàmbe bwà kwenza, civwàYe mufwànyine kwenza.

155 Mònaayi citùdi twètù bàmbè mpindyewu. Mifùndu neyìikalè ànu menemene, bwalu tudi ne cimanyinu cyà Sodomà, mu mubidi. Ndìbà kaayi divwàku balùme ne balùme bàngatangana nkàayabò, dikònyangaja dyà maalu ne bikwàbò, kutamba mùdìbi mpindyewu emu: “lukòngò lubi ne lwà masandi,” cikondo cyùdi kùyiku mwà kukàngulakù tèlèviziyò wèbè kakùyì bukooyà bwà mùshindù kampànda, bintu byà manyaanù byà mu Hollywood? Kàdi bantu, bàdìbìikila mùdìbo beena Kilistò, nebàshààle pambèlù bàpùmbisha mu masangisha à milòmbò bwà kumòna byà mùshindù awu. Cidi cileeja ne nyumà kaayi udi munda mwèbè. Cyà bushùwà. Ne bakàji nebàlwatè ànu mùdi bòbò abu, ne balùme nebàbàlekèlè bàbàlombola eku ne eku mùdìbo bènza kuntwaku amu. Netuvwijè Hollywood cileejilu cyètù, anyi netwitabuujè Dîyì dyà Nzambì pa bwalu abu?

156 Nènku musùmbà ùmwèùmwè awu ùdi mwà kumòna Dîyì dyà Nzambì dishindikiibwe, kàdi ncinyi cidìbo bènza? Bàdi bàDìseka. Bwalu, mbafwè, mbafwè Cyendèlèlè. Kacya kabàvwakù ne mwoyi to. Bu ne bàvwakù ne mwoyi, bàvwa mwà kwikala misangu yònsò ànu ne mwoyi, wà Cyendèlèlè. Kàdi kacya kabàvwakù ne mwoyi to. Bàvwa misangu yònsò ànu bafwè. Kaa, mbafwànyine kwikala bàà kapelu, ne bìitabuujà *cikampànda*, *cikansanga*, anyi *cikankènga*.

157 Yesù wàkamba ne: “Nwènù beena lubombo,” ùbàmbila, wàmabila baakwidi abu bàà mu ditùkù adi. “Mmunyi munùdi mwà kwamba bintu bimpè, pàdìbi ne mukana mùdi mwàkula

bintu bìdi byùle ntèntè mu mwoyi? Numbiikila Mémè mwímpè, ‘Labì Mwímpè, Mulongeshi mwímpè?’” Ùvwa mumanyè civwà mu mwoyi wàbò. Ùvwa mwà kujingulula civwà mu mwoyi wàbò. Yèyè ùvwa Dîyì.

¹⁵⁸ Bible mmwambè ne: “Dîyì dyà Nzambì nditwè kutàmba mwelè wà mvità wà nseke yìbìdì, ne dijingulula meeji adi mu mwoyi.”

¹⁵⁹ Mpindyewu cimanyinu cyà Sodomà aci ncyalùkile, luseka lwà mubidi. Nènku piikalà bintu byònsò ànu bisòmbe pa kaaba kààbì menemene mu mùshindù ùdìbì ne cyà kwikala luseka lwà mubidi, dîbà adi mmunyi mùdì mwà kucyùmusha, mu meeji èbè, wamba ne luseka lwà nyumà kalwèna mwab’ewu pa dîbà dimwèdimwè edi? Nseka yònsò yìbìdì yìdì mu cyalu. Èyowà, muntu yònsò mmwitàbe, ne luseka lwà mubidi lùdì mu lwòlò; kàdi, kaa, luseka lwà nyumà, kî mbaswè kulwìtabuuja to, bwalu Cìdì cìkakòndakaja dilongesha dyàbò.

¹⁶⁰ Luukà 17 ncimanyinu. Luuka 17 ncimanyinu cyàkamba Yesù, ne, mu matùkù à ndekeelu, matùnga ne maèkèleeziyà ne bantu mbifwànyine kwikala ànu mùvwàbì mu matùkù à Sodomà, buloba bwà bàà Bisàmbà byà bendè, ànu kumpàla menemene kwà dyoshiibwa ne dibùtuka dyà Sodomà. Nènku kùvwa ne cyà kwikala kasumbù, munkaci mwà kwindila, bu Abraham. Alùkilaayi, pàakambà Yesù ne: “ànu mwàkadibì mu matùkù à Sodomà,” alùkilaayi nùmonè ne ncinyi civwa mu Sodomà. Wàkabala Bible umweumwe utùdì tubala ewu, Bible umweumwe, mpindyewu alùkilaayi nùmonè ne civwà cinyi.

¹⁶¹ Ki musumbà musungula ngõwu ewu, mubiikila bwà kupàtuka, musumbà wà Abraham, bàvwa bindile mwàna mulaya. Beena Sodomà kabàvwa biitabuuja kantu nànsha kàmwè pa bwalu abu to. Nènku kùvwa muntu wa civùmvù, cidimba cyà èkèleeziyà mu Sodomà mwàmwa. Tàngilàayi Banjèlò bàsàtù abu bàlwa kùdì yònsò wa kùdìbo, tàngilàayi bimanyinu byàkaleejàbo, dîbà adi nenùshiishe kumòna bimanyinu bitùdì basòmbèlemù.

¹⁶² Mpindyewu, aci neciikalè cimanyinu. Ne dîyì dyà cimanyinu nediiikalè Maalàkì 4 ne: “bwà kwalujulula bantu ku Diitabuuja dyà baataatù.” Ki cimanyinu ncyòcì aci, ki Dîyì ndyòdì adi, bilondèshile Mifùndu menemene. Nwamònu anyi? Cimanyinu ncimanyinu civwa ku Sodomà aci, Nzambì mumwènèshiibwe mu bantu.

Ki kwambaYè ne: “Mukàjèèbè ùdì penyì, Sarah?”

Yèyè ne: “Ùdì mu ntentà, paanyimà Pèèbè apu.”

¹⁶³ Yèyè ne: “Nènkwènèkèlè bilondèshile cikondo címvwà mukulayè.” Ki kwambaYè . . .

¹⁶⁴ Nènku Sarah, paanyimà apu, paanyimà Pèndè apu, kwambayè ne: “Aci cidi mwà kwikala nànkù bishi, mémè

ewu mukàjì mununu, yèyè mulùme pèndè mununu? Nènku ànu mùdì bàyaanyi udi pambèlù wàwa, muntu mununu,” mwàkambayè, “katùcyenà ne byà nàнку to.” Kwambayè ne: “Kabyèna ànu mwà kwenzeka to.”

165 Yèyè kwamba ne: “Sarah wèdì mpatà bwà cinyi, wàmba mu mwoyi wèndè ne: ‘Mmunyi mùdì bintu ebi mwà kwenzeka?’”

166 Ki Yesù kwamba ne aci necyàlukilè cyàkàbìdì. Mpindyewu, vùlukàayi ne, Abraham wàkabiikila Muntu awu ne: “Elohim,” Nzambi. Nzambi ki cìvwàYe ne cyà kwikala. Bwà cinyi? Ùvwa mwà kujingulula meeji, ne Yèyè ùvwa ànu menemene pa dìbà. Ne Elohim, Nyumà Mwimpè, (kí mmuntu mukwàbò to) Mupersona ùmwèùmwè awu wàlukila mu èkèleeziyà ne ùvwa mwà kwenza cintu cìmwècìmwè aci, aci cìvwa mwà kwikala cimanyinu. Ne Dìyì òvwa mwà kwikala ne: “Kubààluja ku Dìyì, kwaluja Dìitabuja dyà bânà kùdì baataatù.” Ki cimanyinu ne Dìyì mbyòbì abi.

167 Bimanyinu bitù misangu yònsò biitabiibwa, kàdi bwà Dìyì to. Kí mbaswè Dìyì to, kàdi nebàngate cimanyinu. Pa ciibidilu, nebàcyangàte. Mbaswè cimanyinu, bwalu mbanangè kucìmona, cìdì cìbàsànguluja. Kàdi, Dìyì, kí mbaswè bwà ku—bwà kudyenza to. Vùlukàayi mpindyewu Dìyì adi.

168 Alùkilaayi ku Dìyì cyàkàbìdì. Cimanyinu cyà Yesù cyà Maasiyà, bilondèshile Yeshàayi 35: “Mulèma neàtupike bu ngulungù,” ne byònsò ebi.

169 “Aci’s cìvwa cilenga be!” Kaa, bààkiitaba aci. Aci’s cìvwa cìmpè. Bàvwa biitàbùùje cyòci aci. Bàvwa biitàbùùje cimanyinu. “Lwàkù Labi, mu èkèleeziyà wanyi, netùkwelè Wèwè dibòko menemene. Ncyà bushùwà, tudi tuKwitabuja. Udi mulenga be. Wèwè udi Labi. Wèwè ki Mupròfetà wa citende awu. Lwila mùnu! Dyelangana dyà dibòko dyà mìshindù yònsò! Cimanyinu ncilenga be.”

170 Kàdi pààkaakulà Dìyì, kwamba ne: “Mèmè ne Taatù Wanyi tudi Umwe.”

171 Kaa, ekèlekèle, kabàvwa mwà kwitabuja Aci to. “Udi uDìvwija Nzambi.” Kabàvwa baswè Dìyì to. Bàakaswa cimanyinu. Mbamanyè aci, bàkiitaba ne cìvwa ncimanyinu cyà Maasiyà, kàdi, Dìyì kabàvwa baDiswe to.

“Byenzedi bìndì Mèmè ngèza nenùbyènzè pèènu.”

Ki bòbò kwamba ne: “M’Beelèzèbùlà.”

Yèyè ne: “Nwènu lukòngò lwà nyòka.”

172 Kaa, bààkakina Dìyì adi. Ncinyi cyàkenzàbo? Bààkapàtula Dìyì adi munkaci mwàbò. BààkaMupàtula pambèlù.

173 Yesù wàkamba ne: “Piikalàbò bàbiikila Mfùmù wa nzùbu ne: ‘Beelèzèbùlà,’ mmunyi mwàtambàbo kubiikila bayiidi Bèndè?”

174 Vùlukàayi ne, mu Bwàkabuulwibwà 3, ku Cikondo cyà Laòdikiyà. Eci ki Laòdikiyà; cimanyinu cyà Sodomà cìdi ne cyà kulwa. Dìyì ne: “Alùkilaayi ku Dìyì, kule ne twìtabàayi eyi ne màngumba aa, ne nwàlùkilè ku Dìyì,” pàdiDi dìlwa, bilondèshile Bwàkabuulwibwà 3, Yèyè ùvwa mupàtùdiibwe pambèlù pàà èkèleeziyà, ànu mùvwàbi cikondo aci.

175 “Cimanyinu ncyanyishìibwe, kàdi kî n’Dìyì to.” Kî mbaswè cintu nànsha cimwè cyà dyenza ne Dìyì to. To, to; Dìyì. Kàdi Mòsà wàkamba, bóbò kabàyi baswè, anyì. . .

176 Nzambì wàkambila Mòsà ne: “Bóbò kabààkwitabuuja dìyì dyà kumpàla dyà cimanyinu cyà kumpàla aci to, bàteetèlè ku dìyì diibìdi. Nènku bobò kabàyi benzè nàнку to, dìbà adi nda kangàte ndambù wa màyi ùàpongòlwèlè mu buloba.” Aci ncikòse bwalu. Kwàjikì. “Sukùla, tuutùlù lu—lupwishi lùdi ku makàsà èbè,” mu ngakwilù mukwàbò, bu mwàkamba Yesù. Kwambayè ne: “Tuntà ndambù wa màyi mu musùlù, ùàpongòlwèlè mu buloba, àndamukè mashi, nènku ùleejè ne ke mwìkalàye mwà kutùkijiiibwa, mu mashi.” Ànu nàнку ke mùshindù ùvwàci ànu menemene.

177 Pìikalàbo kabàvwa biitàbùuje cimanyinu to, dìbà adi cimanyinu ciisàtù cìvwa cìcìjikija menemene. Midimu yònsò ya bwambi yìdi ne bimanyinu bisàtù, pìikalàyi mitùmiibwe kùdi Nzambì. Yesù ùvwa ne bimanyinu bisàtù. Mòsà ùvwa ne bimanyinu bisàtù. Noà ùvwa ne bimanyinu bisàtù. Eliyà ùvwa ne bimanyinu bisàtù. Byònsò bìdi bilwa mu bimanyinu bisàtù. Mònaayi. Tèelejàayi, balundà bàanyi.

178 Dìbà didi dyènda dipìta ndambù. Ndi ne. . . Kaa, ekèlekèlè, ncìvwa mumanyè ne divwa diyè nàнку to, ne tusunsa dikumi ne tùtaanu tusambùke.

179 Bu nwènù mwà kwitabuuja cimanyinu cyà Sodomà, cyà Luukà, nwamònu’s, mwàkacilayàYe; nudi nwiitabuuja cimanyinu cyà Sodomà, dìbà adi bwà cinyì kanwènà mwà kwitaba Dìyì dyà Maalàki didi dilonà cimanyinu, bwà “kwalukila ku Dìyì”? [Katùpà kàà mukàbà wà mèyi munda mutupù—Muf.] Bible udi wamba nàнку, ne wèwè ucimòna, pashìishe tèeleja Dìyì dyà cimanyinu.

180 Nyemàayi ciji cìcìlwalwà! Kwèdikù meeji ne: “Bwalu mèmè ndi wa mu UPC, Assemblées de Dieu, Méthodiste, Baptiste, Presbytérien, ndi ne bukenji bwà kubwelamù” to. Nzambì ùdi ne bukolè bwà kujuudila Abraham bàna ku mabwe aa. Tàngilàayi ku Dìyì! Umùkaayi ku ndongolwelu yènù yà malongolodi à cikwapànu, ne bikwàbò. Nzambì neàbìbùtùlè e kubyùmusha panshì pàà buloba. Yèyè neàbìtùkijè mu ndòndò yà mbù wa cipwàmwòyi, ànu bu mwàkenzelàYe Èjiipitù pàakabiikilàYe Izàlèlèlè, ditùnga dipàtuka munda mwà ditùnga. Dìbà didiYe ùbiikila Mukàji—musèla ùmupàtula mu èkèleeziyà,

yèyè neàpicilè mu makenga makolè, wèla mashi èndè pa buloba. Nyemàayi ciiji cicolè cicilwalwà, bwalu cìkaadi pabwipi!

¹⁸¹ Kwèna mwà kumòna bintu ebi kùyì. . .Ncyèna mumanyè ne mmeji kaayi àudi wela bwà bwalu bwàbì to. Mémè ndi mwambula ànu bujitu bwà kubibala ne kwakulapù. Bwalu mbulàale kunùdi nwènù! Nudi mwà kwitabuuja cimanyinu, pashiishe itàbùùja Dìyi didi dilondà cimanyinu adi. Kaa, ekèlekèle!

¹⁸² Tàngilàayi, Mòsà, cifwànyikijilu cyà kupàtuka mpindyewu. Yèyè ùvwa ne cyà kulondela bantu bwalu bwà mulayi ùvwa mufidiibwe kùdi baataatù awu. “Ndi mvùluka mulayi Wànyi kùdi baataatù bààbò.” Nènku mpindyewu cìdi—cìdi Mòsà mwà kwenza ncinyi? Kwaluja myoyi yà cisàmbà ku cìvwa baataatù bàmbè. Nènku ànu mùvwa Mòsà dìbà adi amu, ke mùdi Maalàkì 4 ne: “kwaluja diitabuuja dyà bantu ku Diitabuuja dyà baataatù.”

¹⁸³ Dyelakana dyònsò dyà cyena màngumba edi, ne bikwàbò, kwalukila ku Dìyi! Ndi munumanyè, bantu bààbùngi bàsòmbèle baswè kwenza nànkù; ncyèna ànu nnùtândisha mwaba ewu to. Mikàbà yà mèyi eyi yiyaaya pa buloba bujimà, nwamònu’s, myaba yònsò. Ncyèna nnùtândisha to, kàdi ndi ntândisha muntu kanà yònsò udi ukèngela kutândisha, mwaba wònsò ùdiye awu. Ndi mumyaminyi wa Dimiinu. Ki cyònsò cìndi mumanyè bwà kwenza. Bwalu mbulàale kùdi wèwè bwà kwangata dipàngadika. Nyemàayi ciiji cicolè cicilwalwà, nwènù cisàmbà!

¹⁸⁴ Kwèdikù meeji ne bwalu udi Mpenta to. Kwèdikù meeji ne bwalu mamwèbè ùvwa Méthodiste mulenga, mujidiibwe, anyi ne papa webè Baptiste mwimpè, mwedi wa mbilà to. Kwèdikù meeji ne aci cidikù ne bwalu kampànda kùdi wèwè to. Kwèdikù meeji ne bwalu wèwè udi wa mu èkèleeziyà udibò biibàke to, anyi èkèleeziyà udibò munkaci mwà kwibaka mpindyewu awu to. Kanwèdikù meeji ne bwalu nwènù beena Mpenta nwàkaakula mu myakulu ne kuja maja mu Nyumà, ne kunyeemakana kubànda kupweka mu cibambalu, kùkaadi bidimu makumi ànaayi to. Kanwèdikù meeji ne bwalu nuvwa benze masangisha à dyondopa, ne bikwàbò to.

¹⁸⁵ Kanùpangidikù bwà kumòna cimanyinu aci to, cyà Dikunji dyà Kapyà, cìdi Nzambi mushindike; ne Dìyi didi paanyimà pààCì to, bwà kutàngilakù, kwalukila kùdi Nzambi. Kùlekedikù Aci cikupita to. Kùdi cimanyinu ne Dìyi.

¹⁸⁶ Pàdi muntu ùjuuka ne cimanyinu, ne ngeelèlu wa meeji umweumwe wa kale awu, kùdi cintu kampànda cipampàlàmuke, kacyèna cifumina kùdi Nzambi to. Kaa, ekèlekèle! “Lulàmijaayi tujila Twèndè mpindyewu!” Mpindyewu, nudi nuciitabuuja anyi? “Dìbà adi alùkilaayi, Kaa nwènù mpofò ne bàdi batàngalàjiibwe, alùkilaayi kwènù kumbèlù.” Bible. . . Mufùndi wa musambu awu wákamba ne:

Matunga ngǎwù àkòsoloka, Izalèèlà nyéwù
 utàbuluka,
 Bimanyinu byàkadyànjlà Bible kwamba;
 Matùkù à bàà Bisàmbà byà bendè mmabala,
 mùle tèntè ne bintu bìdì bikwàcishà bwòwà;
 “Alùkilaayi, Éyì nwènu bàdì batàngàlàjìibwe,
 kwènu kumbèlu.”

¹⁸⁷ Alùkilaayi! Alùkilaayi! Mupròfètà mmwambè ne:
 “Nekwikalè Bukènkè mu dībà dyà dilòòlò.” Ànu kumpàla
 menemene kwà Dībà kubweladi dyònsò, nekwikalè Bukènkè.
 Endèlaayi mu Bukènkè pàcidì Bukènkè bwikàlekù. Paanyimà
 pàà cikondo Nsangilu wa Èkèleeziyà neànùbùcìkìlè, ne
 kakwàkwilakù mùshindù wà Bukènkè dībà adi to.

Twinyikàayi mitù yètù.

¹⁸⁸ Taatù wa mu Dyulu, bàdì mu byanza Byèbè mpindyewu.
 Ndi—ndi mummyamine Dimiinu. Ncyèna mumanyè mwaba
 wùdìDi dimata to. Ndi ndòmba bwà Wèwè kuBàbènesha mwaba
 wònsò ùdìBo bàsanganyibwa. Swàkù Bàsanganè mwaba wàBò
 kuntu kwàka, ne joomònaaku mabwe ònsò àdì mu myaba ayi, ne
 miji yònsò yà bisoosà byònsò byà mèbà, mutùdì mwà kwamba,
 ne kuumusha bupidyà bwònsò mu njila. Enzàku nàнку, Taatù.
 Tudi mpindyewu tulambula eci Kùdì, mu Dìna dyà Yesù Kilistò.
 Amen.

¹⁸⁹ Ne mitù yènù miinyika, ne mèsù ènù mabwita. Mǎalabà
 ndilòòlò dyà difestò. Bangènzàmpèkàatù bàà mu cimenga,
 nèngìikalè... bu Mukalenge mwà kwanyisha, nèngìikalè ne
 cyà kwakula naabò. Ndi ngàakula ne disangisha dyà bantu
 basambàkàne mpindyewu. Ncivwa mwà kudìdinga bwà kuyiisha
 cyena-bwalu eci to; ncifwànyine ànu kutàmba kubàfomija
 kupita kwònsò eku, mu disangisha dyà mùshindù awu.

¹⁹⁰ Kàdì, wèwè, dilòòlò edi, udi witabuujà ne udi mumòne
 cimanyinu aci, ne udikù mwà kuumvwa Dìyì adi, pawikale
 mucimòne ne udi witabuujà anyi? Kàdì kwèna—kwèna
 mwitabuujè to, udi witabuujà kàdì kwèna mwanji kuCìitaba
 to, Kilistò mu cyuwidi Cyèndè, udiku mwà kwela cyanza cyèbè
 muulu anyi? Ne mutù wònsò wikalè mwinyika mpindyewu,
 ne dísù dyònsò dibwita. Ela cyanza cyèbè muulu, wámbe ne:
 “Wamvùlùkakù, Mwanèètù Branham, paùdì usambila apu.”
 Nèngìikalè ne disànkà dyà kucyènta. Nzambì àkubènèshè.

¹⁹¹ Taatù wetù wa mu Dyulu, Bible mmwambe ne: “Bùngì
 bwònsò bwàkiitabuujàbo abu bàakabàtìjìibwa.” Ndi ndòmba,
 Mukalenge, bwà bantu bàdì beelè byanza byàbò muulu aba,
 bwà ne bàdì bàcìitabuujà, kì mbanji kubàtìjìibwa dibàtiiza dyà
 beena Kilistò to, swàkù bwà bàpetèku èkèleeziyà udi udyènta,
 ne bàbàtìjìibwè. Enzàku nàнку, Mukalenge.

¹⁹² Kabikadi babàtìjìibwè ànu ne màyì nkààyawù to, cìdì ànu
 ci—cimanyinu cyà pambèlù cyà ne cintu kampànda ncyènzèke

munda. Bible mmwambè ne: “Kùdi Diitabuuja dimwèpelè, Mukalenge umwèpelè, dibàtiiza dimwèpelè,” ne dibàtiiza adi ndibàtiiza dyà nyumà. Mubidi bu mùdiwu mowèshìibwe, cidi ànu cileeji lu cyanààna, anyi bwà kufila cimanyinu cyà ne cintu kampànda ncyenzèke munda. Kàdi musùkà awu ngwòwò ùdi ne cyà kubàtijìibwa ne Nyumà Mwímpè, adi ndilwa dyà Cyendèlèlè munda mwà ngiikàdilù wa bumùntù awu ne dimushintulula, bwà kumuwiya mwena kwitabuuja. Ndi ndòmba bwà bàpetè Nyumà Mwímpè. Ndi mbàlàmbula Kùdi mpindyewu, bu bivùlukilu byà Mukenji, ne byà ngàsà wa Kilistò. Mu Dìna Dyèndè, mmùndi ndòmba. Amen.

Mpindyewu ne mitù yènù miinyika, ne kaneemu kwònsò.

¹⁹³ Ndi ànu ne tusunsa mwandamutekète, ncyèna—ncyèna mwà kujikija pa dìbà to. Ncyèna—ncyèna—ncyèna mwà kwenza mulongo wà babèèdi mu dìbà búngì nànkù to. Nènnulòmbè bwà nwènù kushààla basòmbè ànu myaba yinùdi ayi. Ndi muumvwe bibi bwà mùndi munùlame too ne pashìishe. Netùsambilè bwà muntu yònsò. Nwènù bantu, bàmwè bàà kunùdi mwab’ewu bàdi ne twartà twà disambila, kanùtácishi meeji to, netùnupetè.

¹⁹⁴ Kàdi netwikale ànu mwà kumòna Nyumà Mwímpè ní wàtùbuulwila mpindyewu, nwènù ànu bamwitàbùùje Yèyè ne biitàbuuje ne eci ke cimanyinu. Vùlukàayi ne, Mwanjèlò awu, Yèyè ùvwa muntu; Wàkadyà, Wàkanwà kumpàlà kwà Abraham, kàdi nànsha nànkù Yèyè ùvwa mwà, ne Sarah mu ntenà, Ùvwa mwà kujingulula meeji àvwa munda mwà mwoyi wèndè. Ki civwà cimanyinu ncyòci aci. Yèyè ùvwa Dìyi. Mpindyewu bu Dìyi mwà kulwa ànu kutùdi, dìbà adi, kàbìdi, Yèyè wàkalaya bwà kwenza cintu cìmwècìmwè aci.

¹⁹⁵ Mpindyewu nwènù bàdi mu batèèleji mwàmwa, bàdi kabàyi ne twartà twà disambila abu, ne bamanyè ne kanwàkwikala mu mulongo to, ncyèna mwà kujingulula ne nganyì udi nganyì piikalà Mukalenge kàyì mundèjè to. Nengìkalè... Nènku nudi nwitabuuja ne cyà bushùwà menemene Nzambi ùdi wòndopa babèèdi. Ndi—ndi muswè bwà—bwà nwènù kwitabuuja mpindyewu mene, bwà tusunsa tukesè cyanààna. Nènku sambilaayi ànu cyanààna, nwamba ne: “Mukalenge Yesù, ndi mumanye ne muntu, udi munkaci mwà kwakula ewu, m—mmuntu, kàdi mmungambìle ne, mmutwàmbìle dilòòlò edi, ne mutùjaadikileci; ne, Nyumà Mwímpè, udi bàà pa buloba kabàyi mwà kushipa to.”

¹⁹⁶ Bàvwa mwà kushipa Yesù pàvwàYe mu mubidi; bààkaMushipa. Kàdi mpindyewu Yèyè mmubiike ku lufù, mu ngiikàdilù mutùmbishìibwe, Yèyè kèna mwà kushipiibwà kàbìdi to. Ki kwambaYe ne: “Katanci kakesè ne bàà pa buloba kabààkuMmòna kàbìdi to. Kàdi, nwènù,” badyànjiila kulongolola, aba bàdi balongolwela Mwoyi wà Cyendèlèlè abu, Èkèleeziyà, Mukàji-musèla, “nenùMmòne, bwalu Nèngiikalè

neenù, munda mwènù mene, too ne ku dikumbana dyà maalu wònsò. Maalu Ândì ngènza nenuènzè pèenù.” Milayi yònsò yàkalayàYe eyi.

¹⁹⁷ Mpindyewu, ndi mumanyè ne pàvwàYe pa buloba apa, Yèyè, Nzambi ùvwa munda Mwèndè. Ùvwa Nzambi. Ùvwa kaabujimà kàà Nzambi. Yèyè uvwa Dìyi dyònsò dyà Nzambi dimwènèshìibwe.

¹⁹⁸ Ne Bible ùcidi ànu Nzambi, Dìyi, ne kùdi ndambu wa dibuulula ucidi ne cyà kubuuludiibwa. Ki kwambaYè ne: “Mu matùkù à ndekeelu, pààlwà buloba cyàkàbidì bu Sodomà, Mwànà wa muntu mmufwànyine kubuuludiibwa.” Nèku cimanyinu cyà Sodomà ncifwànyine kwalukila, dîbà adi Dìyi nedibìikile bantu bwà kwalukila, aba bàdi balongolwela Mwoyi abu.

¹⁹⁹ Tudi bamanyè ne, pàvwàYe kaaba aka, kùvwa miliyò yà bantu pa buloba, bàvwà kabàyi bamanyè ne Yèyè ùvwa kaaba aka nànsha; kakùvwa kabingilà nànsha kàmwè bwà kumanya to. Nwamònu anyi? Wàkalwa kùdi aba bàvwà badyànjlila kulongolola bwà kucimòna.

²⁰⁰ Mpindyewu sambilaayi. Mpindyewu ikàlaayi bapùvwe menemene. Kanùnyungi to. Mwaba wònsò unùdi nusanganyiibwa, ku bisàsà, mwìnshì menemene, mwaba wònsò unùdi nusanganyiibwa, kanù—kanùnyungi to, sòmbaayi ànu cimùmà menemene, ne sambilaayi.

²⁰¹ Ambàayi ne: “Mukalenge Yesù, Bible mmwambè, mu Ebèlù 4, bwà ne Wèwè udi mpindyewu mene ‘Mwakwidi Munène udi mwà kulengiibwa kùdi dyumvwa dyà mateketa etu.’ Ne tudi tuKumòna pa buloba, pa Ùvwà pa buloba apa, mukàji mukesè musangu kampànda wàkalenga civwàlù Cyèbè, ki Wèwè kukùdimuka, kwamba ne: ‘WàNdengì awu nganyi?’” Kusokomayè, kàdi pààbì diitabuuja dyèndè òvwa dimanyishìibwe. Yesù kumwambilayè bwà disaamà dyèndè dyà mashi, e kwamba ne “diitabuuja dyèbè dyàkusungidi.” Mpindyewu Yèyè m’Mwakwidi Munène umweumwe awu. Pìikalàbi ne Yèyè ùdi umweumwe awu makèèlèlè, leelù, too ne kashidi, nebikèngele bwà Yèyè kwenza maalu mu mùshindù ùmwèùmwe awu, wèwè—wèwè muMulenge.

²⁰² Ne ciine aci cidi cyènza cinyi dîbà adi? Bìkèngela kwikalè mubidi wa buntu, pa buloba, bwà kwakula Dìyi Dyèndè. “Ndi mwonji wà Mvinyò, nwènù nudi matàmbà.” Kakwèna mùshindù wà kucìseesuka to, balunda bàanyi. Cidi ànu Mifundu. M’Bulelèlè. Nwènù bambi nudi nwitabuuja aci, lwà paanyimà pààpa anyi?

²⁰³ Mpindyewu pambèlu pàpa ikàlaayi ànu ne kaneemu kààbùngì nwenda nusambila, nwamba ne: “Mukalenge Yesù, swàkù ndengè civwàlù Cyèbè.”

204 Nènku nudi numòna ne muntu udi mutambe kwikala pabwipi naanyi, ùdi mu ntántà wa mètres mwandamutekète anyi mapite apu. Ncyèna mumanyè musùùkà ùmwè mu batèèleji amu to. Ncyèna nànsha mwà kumòna muntu nànsha umwe ùndi mumanyè menemene to, dilòlò edì, musòmbe mwaba awu; pa kuumusha Pat Tyler udi musòmbe mwab'ewu ewu mumpàla emu, mulundà wanyi. Kùdi bantu pa tulààlu twà dibunya ne tulààlu twà kwambwila babèèdi.

205 Tuvwa bamòne bwalu bwà muntu mu kalààlu kàa kwambwila babèèdi dilòlò dishàale edì bukànguke kumpàla kwètù, ki muntu awu kajuukilayè kuulu e kuyayè. Bwà cinyi nwènu bònsò kanwènakù mwà kajuuka, dilòlò edì? Nwamònu's, itabuuja nàka, ki cyònsò cidì cikèngela wèwè kwenza aci's. Bwikadi Bwèndè nebucyènzè. Ki Yèyè ewu, nebikèngele bwà wèwè kwimana ku luseke Lwèndè bwà kukubiishaYè mu matùkù à ndekeelu.

206 Mpindyewu, wèwè udi witabuja, nènku wela meeji ne udi musambile musambidilemù, tàngila wèwè ànu lwà kunweku mpindyewu.

207 Ànu mwàkambà Peetèlo ne Yone ne: "Tùtàngile." E kutàngilayè ne ntèmà yònsò, muntu's, mwindile bwà kupetakù cintu kampànda. Yèyè ne: "Argent ne ngòlò ncyèna naabi to, kàdi cìndi naaci. . ."

208 Mpindyewu, mèmè ncyèna ne dyondopa nànsha dimwè, kàdi cìndi naaci, dipà dyà kùdi Nzambi, ndi nkupèèshadi. Bu wèwè ànu mwà kudiitabuuja, Nzambi neàkwate naadi mudimu. Ndi nkulòmba ànu bwà wèwè kudiitabuuja. Cìndi naaci, ndi nkupèèshaci. Bu wèwè mwà kuciitabuuja, Nzambi neàkwate naadi mudimu. Citeetè ànu cyanààna.

209 Mwab'ewu, ki Cyòci eci mpindyewu mene. Amen. Mèmè ntu munangè aci. Kùdi inàbànzà musòmbe ànu mwab'ewu. Ngwa mubidi munène, mmusòmbè ànu mwab'ewu ku ntengu eku. Udi ne kartà kàa disambila anyi inàbànzà? Wa mubidi munène. . . Wèwè kwèna ne. . . Ànu lwà mwab'ewu, kwèna ne kartà kàa disambila anyi? Èyowà. Kwèna ne kartà kàa disambila anyi? Udi witabuja, nànsha nànkù? Kwèna dijinga ne kartà kàa disambila to, wèwè mwà kwitabuja.

210 Diyì didi ditwa dipinga, ki bwà cinyi mbikolè bwà kubiikila bantu mùshindù ewu, kàdi teetàayi bwà kuntèeleja ne ntèmà yènu yònsò mpindyewu.

211 Mèmè ncyèna mukumanyè to. Kwèna ne karta kàa disambila to, ki bwà cinyi kwàkwikala pa cibumbà cyà ku cyambilu to. Bu Nzambi mwà kumbuulwila cìdi lutàtù lwèbè, newitabuuje ne (ncinyi?) ncifwànyine kwikala cintu cimwècimwè ànu mwàkabuulwilàYe mukàji awu cìwà lutàtù lwèndè anyi? Mukàji wa ku ciina cyà màyi awu? Sarah, cìwàye mwambè

aci, ne bikwàbò? Udi witabuuja aci anyi? Udi witabuuja ne ncifwànyine kwikala cîmpè anyi?

212 Udi ne disaamà dyà mu mashi, kùdi lutàtù mu mashi èbè. Piikalàbi ne ncyà bushùwà, ela cyanza cyèbè muulu. Eyo. Kwèna naadi mpindyewu to. Cidi cîteemesha Bukênkè pambidi pèèbè. Yesù Kilistò mmukutwè mushinga.

213 Mpindyewu, kacya ncitukù mwanji kumòna mukàji awu to, kacya bàndela. Mpindyewu ncinyi aci? Bikèngela ciikalè Nyumà. Mpindyewu udi mwà kwamba bu Bâfaalèsà ne: “Aci’s ndyabùlù,” èè, udi upeta difutu dyàbò. Wèwè udi wamba ne: “N’Kilistò,” udi upeta difutu dyà Kilistò. Ndi ngiitabuuja ne n’Dìyì munkaci mwà kumanyishiibwa mu ditùkù dyà ndekeelu edi; kî mmèmè to.

214 Mwab’ewu, inàbànzà mukwàbò mutekète nyèwù musòmbe mwab’ewu. Udi ùsaama disaamà dyà mijilu myùlè mu mikòlò yèndè. Udi ne ntàtù mikòdyàkàne. Udi ne disaamà dyà mwoyi. Udi ùsambidila munanga wendè, mwinè awu mmwanààbò wa balùme. Udi munkaci mwà kudila mpindyewu. Udi mu dipetangana. Mwanààbò awu ùdi ùsaama bikolè. Udi ne disaamà dyà nsùkaadi. Nènku, kàbidi, yèyè ùdi ne mundidimbi mukwàbò, yèyè ùdi ngènzàmpèkààtù. Ne wèwè udi umusambidila. Ncyà bushùwà. Mandèmwanzele Welton, bu wèwè mwà kwitabuuja ne mwoyi wèbè wònsò, Nzambi neàmwenzèlèci. Udi uciitabuuja anyi? Awu’s ke mènà èbè.

215 Mpindyewu aci ncitàmbe cìvwà Yesù mwambile Simonà ne: “Dìnà dyèbè n’Simonà, wèwè udi mwànà wa Yona anyi?” Ikàlà ànu ne diitabuuja. Kùcyèdì mpatà to. Cìtàbùùjè ne mwoyi wèbè wònsò. Wèwè mucitàbùùje, Nzambi neènzè bwà ne cyènzekè. Bu wèwè ànu mwà . . .

216 Mwab’ewu, inàbànzà mutekète nyèyè ewu musòmbe ànu lwà mwab’ewu, mutàngila ànu lwà kùndi eku. Mmwenzè bu udi ne nsukì mikünze. Nsukì yèndè mitùma paanyimà.

217 Kwèna mwà kumòna Bukênkè, bwenzè bu bukùnzùbile, bwènda bunyùnguluka pamutù pàà mukàji awu anyi? Mukàji awu mmumanyè ne cidi munkaci mwà kwenzeka ànu mpindyewu mene, bwalu ùdi munkaci mwà kuCyùmvwa. Cidi pàbwipi nendè menemene, kènà mwà kupanga kuCyùmvwa to. Piikalàbi ne ncyà bushùwà, inàbànzà, ela cyanza cyèbè muulu. Ki yèyè awu.

218 Mpindyewu mèmè ndi mwenyi ànu wa menemene ewu kùdi. Ncyèna mumanyè kantu nànsha kàmwè pa bwalu bwèbè to. Kàdi wèwè uvwa musòmbe mwaba awu usambila. Ncyà bushùwà. Piikalàbi ne ncyà bushùwà, nyungisha cyanza cyèbè mùshindù ewu. Mpindyewu, piikalàbi ne Yesù Kilistò m’Mwànà wa Nzambi, ki cidìYe mene, Mwakwidi Munène udi musòmbe ku dyàbalùme dyà Nzambi. . . Nènku ndi mwimàne mwab’ewu ku luseke lwà dipà, ne mèmè mwinè mu-. . . pambèlù pàà,

ànu pambèlù pàà ngeelèlù wa meeji wa buntu, nciyi ndyèlela meeji to; ngànu mùshindù wà kutalajakù lungènyi lwànyi ne ngeelèlù wanyi wa meeji, ne kulekela ànu Nzambi ùbwelamù. Nudi nwtabuujà ne Yèyè...Mémè, Nzambi mmumanyè ne ncyèna mukumanyè to; ne nudi bamanyè cintu cimwècimwè aci. Pa nànkù bu Nzambi mwà kunsokolwela lutàtù lwèbè, anyi cintu kampànda cyùdi mwindìle, ujinga, anyi cintu kampànda ckwàbò, udi wtabuuja ne Nzambi ùdi mwà, ùdi mwà kucyènza anyi?

219 Udi ne lutàtù ne nyimà webè awu. Aci ncimwè cyà ku bintu byùdi usambidila. Kàbidì udi ne lutàtù ne mèsù èbè. Udi wtabuuja ne Nzambi neàwondòpè ne kuàsàngaja anyi? Udi wtabuuja anyi? Udi wtabuuja anyi? Udi wtabuuja ne Nzambi ùdi mwà kungambila ne wèwè udi nganyi anyi? Mándamù Hallman, wèwè wtabuuja ne mwoyi wèbè wònsò mpindyewu, udi mwà kupeta cyùdi mulòmbe aci. Udi wtabuuja anyi?

220 Nkwèkù kùdi mukàji mununu musòmbe ànu lwà paanyimà pèndè pààpa ndambù. Udi munkaci mwà kusambila, pèndè. Udi ne disaamà dyà nsùkaadi. Ndi ntèkemena ne kènà ùpangila eci to. Cìdi ànu kumutu kwèndè aku. Mmwenzè bu udi ne bidimu byàbúngì. Indilaayi kakesè, Mukalenge àngambùlwishèku mpindyewu. Wendè...Nyèyè awu wàcìbakudi. Mbimpè. Ngàmònu pàtwànganyiyi naaci. Kí ngwa munwemu to. Yèyè ngwa ku Louisiana. Cèndè—cyèndè cimenga mmwaba ùdìbo bàbìikila ne Singer, mu Louisiana. Nènku ùdi ùsaama disaamà dyà nsùkaadi. Dìna dyèndè m'Màdamù Doyle. Pìikalàbi ne ncyà bushùwà, elà cyanza cyèbè muulu. Èyo. Mémè ndi mwenyi wa menemene kudiye, kacya nciitukù mwanji kumumòna to kacya bandela. Kàdi Yesù Kilstò, Mwàna wa Nzambi, mmumanyè byònsò bìdi bikutàngila wèwè.

221 Kùdi inábànza kampànda musòmbe kuntu kwàka, ùmukila mu cimenga cimwècimwè aci, mwaba ùdi ùbìikidiibwa ne Singer awu. Ùdi ùsaama disaamà dyà mashi àya lùbilulùbilu. Nènku dìna dyèndè n'Clark. Udi wtabuuja anyi, Mándamù Clark? Mmwòmò, udi mwà kupeta ciwàlòmbi aci's.

Udi wtabuuja anyi?

222 Ki cimanyinu ncyôci aci! Tèèlejàayi Dìyì! Nyingalàlaayi, alùkilaayi kùdi Nzambi ne lùkàsà lwònsò! Yesù Kilstò ùdi kaaba aka mu Bukolè bwà dibiikà Dyèndè dyà ku lufù; lukongo lwà beena lwonji ne lwà masandi ndwèlù lùpeta cimanyinu cyà Yesù Kilstò udi ne mwoyi munkaci mwà bantu. Kàvwa mwà kucyènza ànu naanyi mémè nkààyanyi to, bìdi ne cyà kwikala ne nwènù, pèènù. Nwamònu's, mukàji ùvwa ne cyà kulenga ku ciwàlù Cyèndè. Nwènù nuvwa ne cyà kulenga ku ciwàlù Cyèndè. Twètù tudi ànu byamù byà mudimu cyanààna.

223 Udi wtabuuja ne mwoyi wèbè wònsò anyi? Mpindyewu pawikalà wtabuuja aci...Mbanganyi bàdi bàciitabuujà, elàayi

byanza byènu muulu, mùshindù ewu, nwamba ne: “Ndi nciitabuuja bulelèlà.”

224 Mpindyewu wèwè mucitabùùje, Yesù wàkamba nunku ne: “Bimanyinu ebi nebifilè aba bàdi biitabuuja; bôbô batentekèle babèèdi byanza, babèèdi nebàsangale.” Nudi nwitabuuja aci anyi?

225 Mpindyewu díbà dikaadi dipite. Katwèna ne díbà to. Nkutùshàadile tusunsa makùmi àbìdì ne tùtaanu mpindyewu bwà díbà dikùmi kukùmbànadi. Nudikù bwà kutentekelangana byanza byènu muntu ne mukwèndè, díbà adi anyi? Nènku nwènu enzàayi ànu mùndì nnwàmbila emu mpindyewu, tentèkèlàngàaayi byanza muntu ne mukwèndè.

226 Mpindyewu nudi bamanyè, kuulu ku bisàsà kwàka, mwaba wònsò unùdì nusanganyibwa awu. Mpindyewu nudi bamanyè's, bu mùdì cintu kanà cyònsò eci mpindyewu, paanyimà pàà Mifundu mimanè kuyiishibwa ne mimwènèshibwe patòoke eku ne eku mu nzùbu emu.

227 Ndi mmòna mukwàbò, mpindyewu mene. Nwamònu anyi? Ne mukwàbò ànu kaaba aka mene, disaamà dyà mpàci wa mènyi. Inàbànzà mwikàle ne disaamà dyà cyàdi. Uh-huh. Twambe ne, Dìdi myaba yònsò mpindyewu, kàdi Dìdi dikutekesha.

228 Ndishìllàngana kaayi, ncinyi kàbìdì? Udi umòna makumi àtaanu, bitu míngà misangu búngì nàнку, kàdi ujinga kumòna makumi mwandamutekète musangu ùdì ùlonda. Yesù wàkenza nàнку musangu ùmwè mu Sychar, ne cimenga cijimà cyàkaMwitabuuja. Bàvwa bindile Maasiyà.

229 Maasiyà ùdi kaaba aka, Nyumà Mwimpè, Maasiyà wa ditùkù edi; Maasiyà udi munkaci mwà kwenza ne Dìyì dishìndikìibwè, dyà mulayi Wèndè.

230 Mpindyewu ndi muswè bwà yònsò wa kunùdì, panùdì nutentekelangana byanza muntu ne mukwèndè apa, panwikalà beena kwitabuuja. Mpindyewu kùsambidi bwèbè wèwè mwine to. Sambidilà muntu awu, ne yèyè neàkusambidilè. Mpindyewu, Dìyì dimwèdimwè dyàkalayà eci mu matùkù à ndekeelu aa adi, ndilayè kàbìdì. . .

231 Nènku vùlukàayi ne, Yesù wàkamba ne: “Bimanyinu ebi nebifilè aba bàdi biitabuuja.” Dyondopa, dyàlukila, ndiyi dyà ne cimanyinu nciitabijibwe. Bàdi batentekela babèèdi byanza, bu cimanyinu; dìyì dìdi ne “àlèluuyàh, Mukalenge wàngòndòpù!” Mpindyewu pìikalàbi ne bimanyinu ebi bìdi bifila dìyì, cimanyinu aci, pìikalàbi ne udi mwena kwitabuuja, necikufilè. Dìyì nedifile cimanyinu.

232 Mémè munùpèeshe cimanyinu eci, cìmvwà munwàmbile ne cìdi cìfùmina kùdì Nzambì aci, ne Nzambì ngudi mucilayè mu ditùkù edi; cìvwa citèkìibwe cyònsò patòoke, ànu mwena bupidyà ke udi kàyi mwà kuciitabuuja. Nwamònu anyi?

Pashiishe Nzambi kukùdimuka e kucishindika, bwà kucivwija nàнку. Mpindyewu Yèyè ùdi kaaba aka.


²³³ Mpindyewu muntu ne mutu, mu mùshindù unùtù nusambila mu èkèleeziya wenù, pìikalàbi ne mmundamunda, anyi ne diyì dikolè, cyònsò cidìku aci, sambidilà muntu ùdi mutentèkèle byanza awu, bwalu ùdi munkaci mwà kukusambidila.

²³⁴ Nènku mpindyewu tàngilàayi muulu. Nènku mu Bwikadi bwà Maasiyà, Kilstò, Wàkabiùshiiibwa ku lufù Awu, mucikale ànu ne mwoyi paanyimà pàà bidimu binunu bibidì, mmunyi mutùdiku mwà kwikala bakwàcike tukùlàkàji mu Nyumà nàнку's? Aci's civwa ne cyà kuteemesha ditùnga edi Kapyà. Aci's cidi mwà kufikisha Beaumont ewu ku dinyingalala, bavwàle nsaka ne badyèle butù. Kàdi necyenzè nàнку anyi? To.

²³⁵ Kàdi wèwè udi uMukèba, ne witabuuja ne Yèyè ùvwa mwà kucyènza ne kulama Diyì Dyèndè, wèwè mpindyewu ngudibò bapèèshe mulayi. Tentèkèlà muntu kampànda byanza byèbè ne ùsambile, pàndi nnùsambidila kuumukila mwab'ewu apa.

²³⁶ Mukalenge Yesù, byàbùngi bikùmbàne mbyambiibwe, byàbùngi bikùmbàne mbyenjiiibwe. Diyì divwà dilayiibwe ndyèdì dimwèneshiiibwe. Maasiyà, Kilstò wa Nzambi awu, ùdi mu Bwikadi bwà Bunzambi. Tudi tuMuumvwa. Tudi tuMumòna. Tudi bamanyè ne Yèyè wàkalaya cyòci eci mu matùkù à ndekeelu. "Ànu mwàkadibi mu matùkù à Sodomà, ki mwikalàbi kàbidì pìikalà Mwànà wa muntu munkaci mwà kubuuludiibwa." Dìbà adi, tudi tumanya.

²³⁷ Tudi tumòna ka—kapyà mu maulu, bômbè bwà tupwishipwishi. Tudi tumòna mùdì matùnga madiibwe kùdì misànda, matùnga ènda àkòsoloka. Tudi tumòna ne Izalèlèlà udi mu buloba bwèndè. Cimanyinu cyònsò civwà mwà kwikala cilayiibwe aci, ncyùle. Cintu cidi cilondà, n'Dilwa dyà Mwànà mulaya.

²³⁸ Éyi Nzambi wa Cyendèlèlèlè, mu Bwikadi bwà Yesù Kilstò, Nyumà Mwîmpè munène udi kaaba aka mpindyewu mwikàle ushindika ne Yèyè ùdi kaaba aka, tèelejààku disambila dyà bantu aba, tèelejà beena Kilstò aba; bwà ne, dìbà dingùumukà, kabàlù kwamba ne: "Mwanèètù Branham ùvwa mwenze cikampànda nànsha." Muntu kampànda mukwàbò uvwabò kabayi bamanyè to, ùvwa mubàtentèkèle byanza, ne bôbò kwondopiibwa. Kàdi Wèwè wàkalaya ne Diyì divwa ne cimanyinu cyàdì. Nènku swàkù bwà bwòndopiibwè, pàndi mbàlàmbula Kùdì apa, mu Dìnà dyà Yesù. 

64-0313 Dîyì Dyà Cìmanyinu
Municipal Auditorium
Beaumont, Texas États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org